

新時代
史地叢書



俄國

現

代

史

主編者
吳敬恆
蔡元培
王雲五

撰述者
查良鑑
校閱者
吳敬恆



國立政治大學
圖書館

分類號 748.21 283

登錄號 29482

MG
K512.5
14

書叢地史代時新

<p>校閱者 吳敬恆</p> <p>撰述者 查良鑑</p>	<p>現 代 史</p>	<p>主編者 吳敬恆</p> <p>王雲五 蔡元培</p>
-------------------------------	----------------------	-------------------------------



行發館書印務商



3 2173 3807 2

748.27
283

俄國現代史

目錄

第一章 俄國現代史之背景	一
圖 俄國之建設	一
第一節 彼得大帝	五
第二節 彼得死後之政治	八

第二章 十九世紀之回顧

第一節 專制政治之改革及其恢復	一一
第二節 佃奴之釋放	一六

29482

第三節 政治維新及革命運動……………二〇

第二章 歐戰前之政治及工業革命

第一節 獨裁政治之維持……………二四

第二節 十九世紀末葉之俄帝國……………二九

第三節 俄帝之野心……………三二

第四節 工業革命及其影響……………三六

第四章 遠東政策與日俄戰爭

第一節 俄羅斯與近東……………四二

第二節 視爲轉機之遠東政策……………四四

第三節 日俄戰爭……………五一

第五章 一九〇四年後之解放運動

第一節 日俄戰爭以後……………五六

第二節 國會之權限及其產生……………六四

第六章 歐戰與俄羅斯大革命

第一節 俄奧交惡及其影響……………七四

第二節 俄羅斯參戰……………七九

第三節 戰時之內政與三月革命……………八三

第七章 革命後之俄羅斯

第一節 臨時政府下之俄羅斯……………八九

第二節 第二次大革命……………九五

第三節 共產黨專政.....九九

第八章 建設中之蘇俄

第一節 革命政府之設施.....一〇四

第二節 蘇聯與世界.....一二二

附錄

俄羅斯大事記.....一二三

參考書目



俄國現代史

第一章 俄國現代史之背景

第一節 俄羅斯帝國之建設



圖 俄羅斯之版圖

俄羅斯位於歐洲之東北，亞洲之西北，幅員廣大，人口衆多，固世界上

第一之大國家也。其疆域北臨北冰洋，西濱波羅的海，南至黑海與裏海，東以烏拉嶺界於亞細亞。屬地可分三部：曰西伯利亞，曰高加索，曰中亞細亞。面積之大，世所罕匹。其民族種類亦隨地域而殷繁。最著者爲盤據歐洲東部之波蘭人，波海米亞 (Bohemia) 人，巴爾加里亞

(Bulgaria) 人，及俄羅斯人，皆斯拉夫族也。



(南)

29482

俄羅斯之立國 西曆八六二年，諾曼 (Norman) 族之一支曰羅斯 (Rous) 者侵入俄羅斯。其首領曰露列克 (Rurik)，征服斯拉夫族，奠都諾弗哥羅 (Novogorod)，稱露列克朝。自是獨攬治權，繼繼繩繩，君位世襲。斯干狄納維亞之國家特性，亦即傳播東漸。是為俄羅斯國之發端。

希臘教之傳入 俄羅斯國基既定，露列克之繼者遂大擴其領土，以抵於得尼普爾 (Dniiper) 河上之基輔 (Kiev) 城境。十世紀末，最初以基督教徒而攬國權之鄔蘭田滿 (Vladimir) 出世。在彼之前固有王后阿爾加 (Queen Olga)，曾親臨君士坦丁，受洗禮而信基督教；歷史上稱爲俄羅斯基督教之先鋒焉。鄔蘭田滿奉希臘派之基督教（即東正教）爲俄羅斯國教。歷代信仰，已及千年。凡信仰相同之小斯拉夫國家受回教徒壓迫時，俄羅斯恆力助之。足徵其宗教思想之深刻矣。

蒙古人入侵 此後二百年中內亂不絕。露列克子孫常因遺產分配問題而引起無窮之爭端。基輔遭燹，諾弗哥羅遇饑饉，而難猶未已，一二二四年突有蒙古人（即韃靼人）成

吉思汗自東來犯之舉。(1169—1227) 既征服中國之北部及中亞細亞，其子孫遂西向侵入俄羅斯。風馳電發，所向無前。除諾弗哥羅城屬都府同盟 (Tatarskie Yearets) 以商業發達自選君主外，其餘俄羅斯王公無不望風臣服，供給軍需，輸納重稅，助蒙古人征戰。於是國事多遠仰蒙古人之鼻息。

伊凡大王 蒙古人對於俄羅斯諸王，獨寵莫斯科 (Moscow) 之王子。故其威勢出於其他屬國之上。至十五世紀當伊凡第三 (Ivan III) (即伊凡大王 Ivan The Great) 在位時，蒙古勢已漸衰。莫斯科諸王遂有殺死蒙古使臣之舉，而翩然脫去蒙古之羈絆。至一四八〇年乃不復入貢，決然獨立。但黑海北岸之疆土，入於土耳其人手中。而俄人已失其停泊船隻之口岸，故此後與土耳其人常發生衝突。此時蒙古人雖失勢，然侵俄野心仍未或已，廣續擾攘，將近百年，俄人視爲心腹大患。

俄帝國之建設 嗣後俄國王公日漸強大。一切權限亦漸入其掌握。伊凡鑒於東羅馬帝國之衰頹，乃篡取其雙頭鷹之徽幟爲俄羅斯國章。一四七二年復娶東羅馬皇帝君士坦

丁之姪女名佐伊葩梨樂格 (Zoe Palaeologus) 者爲后。且自稱爲東羅馬帝國之繼承者。野心勃勃，弗能自羈。乃北服古昔以貿易爲生之北族諾弗哥羅共和國。遂立近世俄羅斯帝國之基，而能與波羅的海諸國作正式之交通矣。

可畏的伊凡 伊凡之孫伊凡第四於一五四七年卽位。雖有偉大能力而殘酷無倫。自

稱皇帝曰『沙』(Czar)，以壯其威信，世人稱之曰『可畏的伊凡』(Ivan The Terrible, 1578-1584)。彼武力雄厚，喜事侵略。兼併城池州郡，不可勝紀。疆宇拓大。南抵裏海之阿斯達干 (Astrakhan)，北抵白河及西伯利亞。伊凡更銳意與商，竭力提倡。一時英俄交易，頗稱發達。及伊凡歿，其所遺之帝國非特領域廣闊，且兵強國富，禦敵有餘，迥非昔日可比矣。

羅曼諾夫朝 伊凡第四既歿，國內大亂。波蘭人乘虛侵入。一六一三年，貴族米開爾羅

曼諾夫 (Michael Romanoff) 擊退波蘭，削平內亂，乃卽位，爲羅曼諾夫朝。有哥薩克 (Cossacks) 人者，向爲極富冒險性之強徒，居俄境南部及波蘭地方。共有二支，皆屬俄羅斯及波蘭統治。屢戰蒙古人及土耳其人，功績甚著。惟以波蘭人待之甚苛，故承認俄羅斯爲惟一宗

主國。因而俄羅斯版圖又爲一展。

中俄交涉 米開爾歿，亞列西斯 (Alexis, 1645—1676) 繼位。一六四六年侵佔黑龍江左岸，旋築要塞於雅克薩 (Alkazin)，爲俄軍根據地。一六五三年侵入什爾喀河流域。清兵擊之，遂發生中俄交涉。一六六七年與波蘭締結條約，割據基輔 (Kiev) 斯摩稜斯克 (Smolensk) 及東部烏克蘭，并以得尼普爾河爲俄波之分界。

第二節 彼得大帝

彼得大帝 亞歷西斯再傳至彼得大帝 (Peter The Great, 1682—1725)。彼得自幼聰穎過人，性喜船務及機械。一六九七年嘗親赴歐洲西部，歷遊德、英及荷蘭等國，專事考察其工藝、軍務、文學及美術。所經之地必聘請專門人才，攜之回國，以備改革國政。其時國內之貴族及教士，對彼得提倡之新思想，頗持異議。甚有謂彼得乃一反對基督之人者。故與禁衛軍合謀叛亂。事洩，彼得於一六九八年遊興正濃之際，急馳返國，捕殺首犯。亂遂平，國祚得以

無恙。

銳意變政 彼得在位始終以改革爲事。首以新法改組其政府及軍隊。繼則灌輸西方之文明。莫斯科維帝國 (The Empire of Muscovy) 所有韃靼民族之遺風，盡行除去；而改用法德二國之習慣風俗。彼得令臣民離去東方式之鬚，改著西服。男女社交，務使公開。一破昔日男女隔絕之風。時俄人多信仰希臘教 (Orthodox)。彼得深恐此輩教士有反對改革之行爲，故規定傳教師必須先得欽派人員之審查認可，方可執行職務；以是皇帝之權力，遂更擴大。

外交方略 上述各事，不過彼得對於俄國內政革新計劃之一部。其向外發展之外交政策，固亦極值注目者也。彼得一面銳意墾殖西伯利亞；一面擬南於黑海，西於波羅的海，得良港，爲海軍根據地，以發揚國威。爲實行此項政策，一六九五年及一六九六年，兩次侵入土耳其，奪得阿速夫海 (Azov) 附近之地。但因土耳其扼守他大尼里峽 (Dardanelles Straits) 不能作有效之軍港。欲得波羅的海之地，又礙於瑞典之威權。其時瑞典代有名君。兵

力雄厚。鄰國皆畏之。一六九七年查理十二 (Charles XII) 卽位，年僅十五歲。各國視其年幼可欺，羣思一逞。丹麥波蘭相繼開釁，欲侵瑞典之領土。彼得雖亦有此野心，但因是時正與土耳其交戰，故於一七〇〇年七月休戰以前，佯言親善。迨於八月十八日聞得俄土條約成立後，次日便與瑞典正式宣戰。不意查理用兵神奇。轉瞬之間，攻克哥本哈根 (Copenhagen)。丹麥不得已而乞和，訂條約于達刺凡大 (Travendal)。旋即東向俄羅斯，以少數軍隊破數萬之衆；大有撼山易，撼瑞典軍難之勢。惜兵勝則驕，查理以爲俄羅斯隨時可得，乃不復注意，而轉向波蘭。彼得則發奮練兵，仍事征略。卒於一七〇九年戰勝瑞典於波耳多瓦 (Pultowa)。

俄瑞條約 一七二一年，瑞典與俄羅斯締結尼斯塔條約 (Treaty of Nystad)。俄羅斯因之得里窩尼亞 (Livonia)，愛沙尼亞 (Estonia) 全部，及芬蘭一部。於是領有波羅的海東南岸一帶地方。至於黑海方面，其始雖得阿刺夫，然不久復失；故彼得之志，終未得逞。

聖彼得堡 彼得鑿於舊都莫斯科 (Moscow) 爲舊黨之中心，一切窳敗風習，不易驟改，乃擇於尼瓦河 (Neva) 畔濕地，另建新都，曰聖彼得堡 (St. Petersburg)。新都告成，又

事建築，百物羅列，應有盡有。自此俄羅斯遂代瑞典稱雄於波羅的海而列於歐洲強國之林矣。

第三節 彼得死後之政治

女帝當朝 彼得死後三十年間，俄羅斯之君主多懦弱無能。一切改造事業，盡行停止。叛亂時興，革命恆起。首繼帝位者為彼得之寡妻喀德鄰第一 (Catherine I)；學識毫無，致國內紊亂，紛爭迭起。再傳至伊利薩伯 (Elizabeth)，重外交，得芬蘭南部，并參與歐洲各國反對普魯士王大腓特烈 (Frederick The Great) 之戰爭。死後由其姪繼位，與普修好。是為彼得第三 (Peter III) 在位僅六月，與其后不睦，后恨之，乃陰促禁衛軍叛，遂自立為女帝。即喀德鄰第二 (Catherine II, 1762-1796)。帝本德國產。一七四三年出嫁時僅十四歲。既入俄羅斯遂改奉希臘教焉。在位共三十四年。為人雖放蕩詭譎，然勤於政事，且知人善任。故國基穩固，得承彼得大帝之志，盡量輸入歐洲文化。

喀德鄰第二 喀德鄰第二對十八世紀之文學及科學的進步，頗富興趣，并決欲提高

俄羅斯之文化，以示不弱。彼極欽慕當日之哲學家及改革家。嘗與福耳丹耳 (Voltaire) 及其他者宿通信，討論其改革之計劃。當百科全書之作者狄德羅 (Diderot) 貧困時，彼曾助以資斧，并邀居宮中，以示崇敬。但女帝對於佃奴制度獨無改革，反禁止佃奴向政府訴苦。因之佃奴景况較前益困，而人數亦愈增。旋又將教會及寺院之資產收爲國有。於是教士亦須仰賴皇恩以圖存。君威浩大，從此無不頂戴尊從矣。

俄土戰爭 其時波蘭及土耳其內亂頻仍，無時或已。喀德鄰乘機干涉波蘭內政，國益危。土耳其大驚，遂於一七六八年向俄宣戰。女帝先以重兵鎮壓波蘭，分水陸兩道，進攻土耳其。其重佔彼得大帝時代得而復失之阿刺夫，更進佔摩魯達維亞 (Moldavia)，窩雷啓亞 (Wallachia)，及不加勒斯多 (Bucharest)。海軍則由波羅的海出地中海。一七七〇年，大破土耳其艦隊。一七七四年七月，俄獲全勝。割據要地，并迫土耳其承認克里米獨立。一七八三年，女帝吞併克里米爲俄土，築礮臺於海濱，以資防護。土憤與戰，復敗。一七九二年與俄議

和，承認克里米及得尼普爾河畔之地歸俄有。

瓜分波蘭 雖在俄土交戰之際，喀德鄰固未嘗忘懷於波蘭。一七七六年乘波蘭衰頹，合德，與兩國實行波蘭第一次分割。俄得都納（Duna），及得尼普爾兩河以東之地。德，奧亦各分潤不少。因之波蘭只餘舊有領土四分之一。一七九三年俄，德，奧，實行波蘭第二次分割。俄得波蘭東部服爾欣尼亞（Volhynia）及立陶宛（Lithuania）東部。女帝乘波蘭衰弱，更強迫承認所提之條件：即（一）俄軍得自由出入波蘭，（二）將來若有戰爭俄為波蘭軍隊之指揮，（三）嗣後波蘭與外國締結條約時，須先經俄許可。一七九五年為波蘭第三次分割。俄得立陶宛西部及庫爾蘭（Courland）地方。俄羅斯大帝國因以完成，而波蘭帝國則與世界歷史暫告離別矣。

第二章 十九世紀之回顧

第一節 專制政治之改革及其恢復

亞歷山大第一 亞歷山大第一 (Alexander I, 1801—25) 乃喀德鄰第二之孫，於一八〇一年繼其父保羅 (Paul, 1796—1801) 爲帝。銳意維新；裁撤汚吏，改組政府，卹憐佃奴，減其擔負。對西歐政治則設法參與。當各國聯合對付拿破崙時，亞歷山大亦躬與其役。維也納會議 (Vienna Conference) 席上談判重大問題。迨會議告終，乃更聯合西部歐洲各國之君主，組織神聖同盟 (Holy Alliance) 以維持基督教之道義。聲威之盛，於斯可見。

政治之新設施 亞歷山大第一既欲維新，故對波蘭及芬蘭等屬國，務求寬厚。一八一五年，俄屬波蘭成爲王國。俄帝許其制定憲法，得以自主。惟仍隸屬於俄帝之下。俄帝組織議會，以規定立法及租稅；并任命波蘭官吏，治理內政；編組波蘭軍隊，以鞏邊防。對芬蘭亦然。許

芬蘭有組織議會，治理內政，修訂法律，鑄造貨幣，及設備軍隊等權；無異獨立國家。俄羅斯與芬蘭之間不過僅爲身兼二主之俄帝所維繫而已。

反動政策 歷代俄帝之主張自由維新者，最後常仍趨向反動。亞歷山大第一亦難例外。彼因感於當時禍亂繼作，辦事棘手，遂一變初衷而反對維新。彼得格勒地方之兵變，駐德使臣之被暗殺，祕密團體之增加，及波蘭完全獨立之宣言諸事，均足使之深信與相梅特涅之言。梅特涅嘗曰：『自由主義者，乃革命及無政府之先聲也。』於是聯合舊黨反對維新。命官吏盡力抑制新黨。凡雜誌，書籍等檢查極嚴。甚且禁止出版。大學教育，嚴加限制。波蘭議會之權利範圍，亦爲縮減。至是俄國之政府，遂變本加厲，完全採取壓迫政策矣。

十二月之叛 一八二五年，亞歷山大第一逝世。亞歷山大無嗣。其弟君士坦丁 (Constantine) 應繼帝位，惟礙於其妻爲波蘭女子，故讓與其弟尼古拉 (Nicholas, 1825—1881)。國內革命黨乘機主張廢除專制，以君士坦丁爲立憲君主。軍隊響應者頗多，咸呼『君士坦丁萬歲！憲法萬歲！』時在一八二五年十二月間。故史家咸稱之曰：『十二月之陰謀。』奈以

組織未嘗，不久即敗；其領袖或被殺戮監禁，或被放逐西伯利亞。事乃寢。

尼古拉之專制 尼古拉第一者，俄羅斯之模範皇帝也。身強嗜武，視政府如軍隊，務須整齊嚴肅。故以批評政府政策，爲不服從官長；以進行自治，爲圖謀叛亂；均嚴行禁止，不令發生。但其爲人正直，誠懇。待友尤忠信篤實。於個人私德，固毫無可指摘者。尼古拉愛國心盛，極欲使俄羅斯爲安樂享榮之國家。彼深信俄羅斯對世界具有重大使命，故反對外入之思想，主張保存國粹。且欲以維持專制政體及信奉希臘教義爲發揚本國光榮之途徑。

尼古拉紀律 彼在位時有所謂尼古拉紀律 (Nicholas System) 者。其目的爲盡力排除國內之維新主義，保持民族精神。彼深恐俄人爲西歐思想所薰染，故外國書籍輸入時，或外國旅客入境時，必先經專員檢查。俄人非得特別允許，不能移住或遊歷外國。凡關於宗教及科學書籍，均須經警察及教士之檢查。任意發言或私誦禁書，均治以重罪，雖音樂譜集，亦必先經審定；蓋恐其音調或足爲革命者之暗號也。大學教育尤加偵察。督察時赴講室，以防教員及學生之軌外動作。一八五三年，在此有五千萬人民之大國中，僅有三萬學生可受

大學教育。其嚴厲亦可知矣。俄人之留學外國固已被禁止。即國內組織讀書研究會社，亦所不許。至官吏公然拆閱人民之私信，猶其小焉者。此種專制情形使人民幾無呼吸之餘地。二十世紀初年之革命非無由也。

壓抑波蘭 波蘭人處於侵略者鐵蹄之下，雖有自由之憲法，然究心不自甘；於是多暗地組織團體，以謀恢復其祖國。一八三〇年，華沙（Warsaw）之波蘭人起事，佔其城，逐出俄羅斯之官吏。設臨時政府，求援於歐洲各國。一八三一年一月二十五日，宣佈獨立。然歐洲各國畏俄之強，無敢應者。已而俄皇遣重兵入波蘭。亂遂平。尼古拉第一對波蘭因而更加嚴酷。廢除一八一五年之憲法，并於一八三二年明令波蘭劃歸俄羅斯之一部，與俄羅斯生存於同一旗幟之下。停止議會，并置俄國都督，治理一切事務。波蘭之官吏均易俄人。波蘭之文字亦改俄文。肇事之亂黨，處罪至殘酷。資產皆被沒收，亂徒咸置監牢；或放逐邊境，或被殺戮。移波蘭人四萬五千戶於頓（Don）河流域，及高加索（Caucasus）山中。波蘭人為避免俄帝之壓制，逃至西部歐洲為難民者，不計其數。此時波蘭雖受巨創，然波蘭人民無時不臥薪嘗

膽，思所以恢復祖國也。

俄土戰爭 尼古拉之外交政策有二目的：一爲抑止國外之革命運動，一爲消滅土耳其其在歐洲之勢力。其時各國皆有劇烈之革命運動，推翻專制政府，獨俄羅斯無恙。尼古拉見國內君臣既能相安無事，遂參預國際紛爭諸問題。彼曾兩戰土耳其。一在一八二八年；一在一八五四年，卽歷史上著名之克里米亞大戰（Crimean War）是也。俄帝野心彰明昭著，遂激動英、法兩國及撒地尼亞（Sardinia）之公憤。於一八五四年出而助土戰爭。俄羅斯軍隊大敗。其在克里米亞米島上之根據地賽巴斯拖堡（Sebastopol）爲聯軍所佔。尼古拉大失所望，積憤而亡。時一八五五年事也。其子亞歷山大第二（Alexander II 1855—1881）卽位，與敵言和。威盛一時之『尼古拉紀律』因戰敗而受打擊，不久卽與賽巴斯拖堡同失去矣。

第二節 佃奴之釋放

革新與進步 亞歷山大第二即位時方三十四歲。對於國家政治尙嫌幼稚，且乏經驗。其父素恨民治平等，而亞歷山大第二則性甚和霽，不喜軍事。彼決意以時代精神治理國家，不以遵守祖先精神爲職志。彼自身雖非建設之政治家，而能聽從賢明政治家——羅立斯麥力科夫及德密特利密利廷 (Loris-Melikov) 及 丹尼爾米林廷 (Dmitri Milutin) 等——之諫議。故亞歷山大朝廷在俄史中成爲革新及進步之時代。

佃奴之苦狀 亞歷山大第二因釋放佃奴，而享『開明君主』之美譽。中古時代，佃奴制度曾盛行於歐洲。但十四世紀時英、法兩國卽已廢除。旋受法國革命及拿破崙之影響，此種制度完全絕跡於西歐。保存之者惟俄羅斯一國而已。佃奴之身體，絕對不能自由。無地主之許可，不准稍離境地。一如樹木果實之隨地生長，苟非地產變賣，絕無更換主人之希望者。一八五九年，俄羅斯約有二千三百萬男奴。其中約有一千二百八十萬爲皇室之奴，屬於國有；餘約有一千零二十萬爲大地主之佃奴。俄羅斯富翁之家資，非以土地房屋或其他動產之數量爲平衡，而以所有之男奴數目爲準繩。女奴則不認爲資產。佃奴耕田須納費，或服務。

若服務，爲佃奴者每星期爲地主工作三日。地主如不需要佃奴服務時，可驅之赴城中爲人工作，獲得金錢，再行納付。俄法規定地主可使佃奴做任何工作。地主亦可收爲家用，且得自由鞭笞，逐放於西伯利亞或竟投之軍中。佃奴結婚必得地主之同意。地主若使佃奴與人在某時結婚，佃奴必須服從。地主卽一地方之審判官。佃奴毫無權利，一切祇憑地主之指揮。佃奴嘗受三重壓迫。若付款遲時，受地主之鞭責；若付稅遲時，受官吏之鞭責；若犯罪時，受法官之鞭責。其地位之卑下困苦，實與牛馬無異。佃奴既處此種種壓迫之下，貧困益甚。每不足以自給。於是恆有搶劫，暗殺，放火等事，甚或起而作亂，以圖報復。數十年來叛變時起。雖政府防止極嚴，然結果仍有加而無減也。

釋放佃奴

俄羅斯之佃奴，與美國黑奴不同。蓋此輩佃奴與其主人皆屬同種。故熱誠之愛國者與博愛之慈善家，均提倡釋放。俄人恆視佃奴制度爲俄羅斯國之污點。於十九世紀之始，卽運動廢除之。雖專制如尼古拉第一亦未嘗不思改良。惟所慮者，釋放佃奴有害於地主之物權耳。亞歷山大第二卽位後，卽決意釋放。此非僅以亞歷山大爲人慈善兼好自由

之故，實亦因彼認廢除佃奴制度，自上倡行較諸俟下方興起爲妥善也。俄帝以調查奴制全權付與農事委員會，并通令全國官吏，告以釋放佃奴之事實。此舉大受新黨之歡迎，即大地主中亦有贊悅附和者。幾經討論，乃於一八六一年三月三日下令釋放國內之佃奴。但其時被釋放者，僅耕種私田之奴隸。二年後，家蓄佃奴亦得釋放。迨一八六六年皇室佃奴恢復自由後，釋放之工作始告完成。

此聲名籍籍之釋放法令，殊值吾輩之注意。其要點如：（一）佃奴立即取得國民資格，得享所有權利；並脫離地主之羈絆，而隸屬於政府之下。（二）所用之一切宅舍，器具皆歸佃奴享有。（三）給與佃奴土地，使得維持其生活。蓋釋放而不與以土地，佃奴又須另覓工作以謀生，勢必仍至依賴先前之地主。故俄帝有言曰：『釋放而無田地，則將增加地主之權利。』旨哉斯言。

釋放後之佃奴 佃奴應得田地，既如法定；但田地如何分配始能公允，卻爲難決之問題。全國地主田地，半給與農民，政府又慮地主損失過大，故設法補救。規定農民有繳納地價

之責。其價先由政府代付，由農民分期償還。年納特稅，共付四十九年。政府所定之地價，常較其真價爲高。以是所謂農民釋放，實恃農民自己掙扎而得。蓋彼輩仍須以己力所得，作釋放之代價也。彼輩絕非願爲『國家之佃奴』所願者，實乃不費償金而享有田地之自由人也。故佃奴每有鑒於政府之待遇，不願釋放者。怨言時起，羣思作二次釋放運動。各地常有叛亂發生，但政府均用力戡平焉。

村落 地主雖交出其領土之一部份，然佃奴個人仍一無所得。田地之所有權屬諸村落(Mir)之全體。凡納稅及分配田地，均由此村落負責。俄羅斯風俗，若於法定期中，有村民三分之二之請求，即可重新分配於各戶。此種村落爲各家家長所組織。舉年長者爲領袖，負代表本村與中央政府交涉之責。農民耕植、播種、收穫之時間，均須由村部定奪。農民若離村外出，必須得村部之許可；否則沒收其家產。若村中人口增加時，各人所分得之田地，必須減少。生活之機，遂亦因之而減。是以農民所有之地，較初時分配所得相差甚遠。農民貧困，社會動搖。政府遂不得不下令准農民私有田地，并得自由離其村落，求工作於他處。村部制度，遂

漸廢除。

第三節 政治維新及革命運動

政治之改革

亞歷山大第二德政甚多。既釋佃奴，復從事於司法及行政制度之興革。昔日司法事宜，向操之於普通官吏，審判既不公開，又尙武斷。一八六二年亞歷山大第二下令司法獨立。倣西歐各國制度改組法庭。編修法律。指派檢察官吏。採用陪審制度。保障法官地位。公開司法訴訟。當時陪審制度雖經實行，而國事犯仍須特別裁判。幽閉獄中，殘酷如故。

地方議會 城市生活，因工商業之發達而進步；鄉村情形，因釋放佃奴而增繁。於是地方自治應運而生。一八六四年俄帝遂下令於各省區設立地方議會（Zemstvo）。由大地主與市民及農夫之代表組織之。議會得規定地方上之稅則。舉凡地方事業，如鐵路、橋樑、建築、教會、學校，及貧病或罪犯救濟等事，均由此種議會議定。其他如地方上之法令亦均委任議會之常務委員會辦理。其權甚大。

波蘭叛亂 總之，亞歷山大第二之大改革爲一八六一年之釋放佃奴，一八六二年之改組法庭，及一八六四年之建設地方議會。此外更仿德國制度創辦中學教育，分文、理等科。尼古拉時之嚴令，盡行廢除。大學生之數目因以增加。書籍、雜誌，亦復得暢銷。不意一八六三年，波蘭人復行叛亂。俄帝遂遣兵平之。俄羅斯舊黨羣起詰責。語以波蘭之劇變，純由俄帝寬政之過失。若再任西歐思想輸入國內，則將發現更甚之流血慘劇。帝爲之動，乃轉入舊途，一變從來之自由主義，厲行專制政治。束縛出版自由，監督學校教書，廢止與希臘教義相違之科學研究，并不准省市地方議會有何政治之評論。省長對其議案可加以否決。尼古拉時代之密探制度，亦行恢復。惟亞歷山大第二末年尙有一改革事業，即改編軍隊并仿德國採用徵兵制是也。

虛無主義之激昂 時國內有知識者因政府專制，漸發生一種反抗之精神。其著者有虛無主義派，爲赫景 (Alexander Herzen, 1812—1870) 等所倡。崇拜科學及理智，贊揚高等教育及西歐各國之物質文明。對於國家教會及種種惡劣舊習，極端反對。大文豪屠格

捷夫 (Thurgoniel) 於一八六二年出版之小說父與子 (Fathers and Sons) 中謂：『虛無主義之信徒，對任何威權，必不屈服；無論有何報酬之原理，亦不肯採納。』自虛無主義信徒方面觀之，俄羅斯一切組織均須破壞，以建設新的好的社會。

無政府主義 其次則為社會主義之傳播。今所論者，非如西歐國家之勞工政黨，乃為巴枯寧 (Mikhail Bakunin, 1821—78) 所提倡之無政府社會主義。俄羅斯社會主義者，不但向工人宣傳，且向農民宣傳。彼等提倡推翻政府、教會、及家庭。惟彼等不能利用代議政治或其他和平方法，故不得不採取暴動策略。

恐怖主義之勃興 亞歷山大第二愈採反動政策，政府愈壓迫社會主義者及虛無主義者，則革命運動愈形激烈。漸有一般熱忱改革者出，以為除與俄帝及其僚屬——官吏，貴族，及教士——爭鬪外，別無他法。恐怖主義者 (The Terrorists) 因而成為革命運動之第一種勢力。其間有虛無主義者，有社會主義者或無政府主義者，亦有無所信仰而祇恨不公之法官及稅吏者。恐怖主義之中樞為一秘密委員會。是會於一八七八年組織於彼得格勒

(即聖彼得堡。一九一四年改今名。)設立印刷所，實驗室，以製造炸彈等品。黨員絕對服從黨令。三年之間暗殺顯宦六人，密探九人。黨員方面被絞斃者三十一人，被監禁者八人，自殺者三人。但恐怖黨人并不稍餒。多次謀刺俄帝，惟皆未得成功。

俄帝至是大驚，雖欲委託寵臣抑壓而無效。政府中人咸勸皇帝讓步，以平革命黨之心。俄帝不得已，於一八八一年三月十三日，下令由大臣及名人組織特別委員會，以改革行政。然爲時已晚，補救無及，當彼允許立憲之日，中途被刺而死。此俄帝多年抑壓民意之結果也。

第三章 歐戰前之政治及工業革命

第一節 獨裁政治之維持

維新俄帝亞歷山大第二慘死後，其子亞歷山大第三（1881—1894）繼位。其尙武精神，有如其祖尼古拉第一。惟幼年教育不良，故對西方文化，仍事反對。且生性頑固，卽位後堅欲避免乃父之解放傾向。彼謂若救俄羅斯於革命及無政府現象，舍俄羅斯之天賦靈資及俄羅斯人之世襲榮華——專制政治，斯拉夫民族主義與東希臘聖教——外，鮮能奏效。英、法、各國之代議政治無能爲力也。因是維持專制政體，力行俄化；以擴張斯拉夫族及希臘教之勢力。舉凡工廠之創設，鐵道之建築，資本之儲蓄，鄉民之移住，城市中產階級及勞働階級之發生——西歐工業革命之大批輸入——咸足使俄羅斯專制帝國雜以西方之自由主義。維持專制，實行俄化，及俄羅斯工業革命；凡此三事，皆亞歷山大第三之卓績，值吾輩研究者

也。

亞歷山大第三 亞歷山大第三首先取消其父之末次命令，報復暗殺叛徒，并宣告於世界曰：『上帝命吾輩有健全之政府……深信專制之威權，吾輩即用以抵抗一切侵害；以謀全體國民之幸福。』彼能實行此種專制政策，多賴性情相投之二人爲助。此二人者，即普雷味 (Plahve) 與坡俾多諾塞夫 (Pobédonostsev) 是也。

坡俾多諾塞夫 坡俾多諾塞夫 (Konstantine Pobédonostsev, 1827—1907) 洞悉法律。曾充莫斯科大學法學教授，亞歷山大第二之法學教師，希臘教會之掌教。此於亞歷山大第三有巨大影響之人物，極力提倡反動思想。演講著作之中，無時不斥西歐各國政治社會之組織爲乖謬，且謂此制度絕難實行於俄羅斯。彼認爲議會乃野心家之爭持地，新聞紙乃散佈謠諑之工具，通俗教育富危險性，君主立憲純係『癡人說夢』，陪審制度徒足鼓勵人民詭辯。此反動思想家有言曰：『苟人民之代表皆爲聖賢，則代議政治將爲最優之制度；但代表之人格，每多卑劣，故代議政治終爲最劣之制度。』故坡俾多諾塞夫深信政府之

要務，爲保守專制，并使人民崇信希臘國教。

普雷味

亞歷山大第三既爲坡氏之思想所左右，遂命坡氏總理宗教事務；於外更有普雷味（1826—1904）爲之策劃國政。人民稍有反對即處以鞭笞，監禁，放逐等刑。於是在亞歷山大第三時代，革命宣傳，遂暫潛伏。

俄帝之專制

亞歷山大第三得普雷味及坡俾多諾塞夫二人之助，遂思所以能統一帝國行政及獨裁之方。首命欽派之大地主管理昔日完全自主之農村。以前其父許與省議會及市議會之權利，漸形縮減。復修改議會編制法，增加貴族及官吏之代表，而減少農夫之代表。凡議會通過各案，該地方長官得以否決。亞歷山大第三反對通俗教育，而令教會掌管初等教育。昔日外國僑民所享之特權，逐漸取消。當時彼惟熱心於擴充中亞西亞之俄羅斯領土；至外交方面，彼因俄羅斯在歐洲南部之勢力日漸衰頹，皆由德國幫助奧國所致，故遠棄俾斯麥及德國。而以此極端專制之俄羅斯帝國與極端共和之法蘭西民國相提相繫，發生密切之友誼關係。

專制政治在俄之遺毒

俄羅斯因亞歷山大第三維持專制，受莫大之弊害。俄帝雖或明智，而對數萬萬人民之需要，毫無所見。即尊嚴之命令，恐亦不能遍行全國。一切事務，彼皆信託於三數大臣，及軍事、財政、司法、行政等長官。在偌大之帝國內，雖具奇才之皇帝，恐亦難得防止稅吏、警官，及邊吏之不勝任或腐敗情形。然亞歷山大第三者，固非奇才之皇帝也。況少數富裕貴族，壓制多數貧困農夫；武人跋扈，官吏貪污，國家之行政，焉能不紊，財政又焉能無弊乎？故與其謂亞歷山大第三之壓抑政策，致此結果，寧謂爲俄羅斯專制之流弊也。官吏祇知阿諛求榮，地位愈高，其弊亦愈甚。正如法國革命前之狀況，因不勝任而造成腐敗，又因腐敗而造成不勝任。但俄羅斯人民受政府之壓迫而不敢言，其苦尤甚矣！

俄羅斯維持專制之原因

吾人研究俄羅斯之現代史，不得不問此種西歐各國早經廢棄之專制政體，何以在俄羅斯獨能歷代相傳而無斷。是否因俄羅斯之民族特性使然，亦宜審察。關於第二問題，吾人不能不承認俄羅斯之繼續專制，由於人民之默許。蓋人民果有堅決反抗之意志者，固不難效仿法國一七八九年之大革命也。但於此民族特性之外，猶有

數事足使俄羅斯繼續專制政治者。第一，統治官吏爲數頗多，權勢甚大；既受皇室之眷養，當然盡忠於帝王。第二，人民深信希臘教。視教會如護符；視皇帝爲教會之擁衛者。故宗教思想深印人民腦筋。政府因以得助。第三，缺乏普通教育。初等教育均爲教會所包辦，當然忠心於皇帝。他如人民之散漫，財政之困乏，均足阻礙教育之普及。政府甚或摧殘教育。亞歷山大第三死時（一八九四年）鄉村之不識字者，竟達百分之五十至九十；而城市中亦不下百分之四十至六十五。此種現象，美各國皆無有也。第四，統治官吏之壓迫手段，使人民敢怒而不敢言。任意逮捕，監禁，放逐，殺戮等刑，使人民皆生畏心，裹足不前。解放運動，遂無從發生。第五，教會及官吏，灌注農民一種思想，謂：俄羅斯帝國乃一廣大之快樂家庭。皇帝乃人民之國父，以其慈愛之心，爲人民謀幸福。第六，十九世紀之俄羅斯，始終爲一農業國家。人民受環境影響，皆主保守。對政治之劇變，漠不關心。且俄帝歷破蒙古，瑞典，土耳其，波蘭等國之侵略，又有彼得大帝，喀德鄰女帝，及亞歷山大第一等，皆爲英明之主，功績昭著；故覺俄羅斯之榮耀，皆專制皇帝所賜與，乃不加反對。

此外更有較甚之緣因在，即俄人之愛國心及好勝心是也。智識高尚者，如普雷味及坡俾多諾塞夫等皆懷此念，而贊揚專制。彼等及其他智識優良之俄人，均思民治絕難使偌大之俄羅斯治理有條，專制則不僅爲執政之利器，且可使俄羅斯永久統一，而能盡力於宗教上及文化上之使命。此即大斯拉夫主義，亦即亞歷山大第三之俄化野心也。

第二節 十九世紀末葉之俄帝國

十九世紀末葉之俄帝國 吾人欲了解大斯拉夫主義之意趣，及俄帝亞歷山大第三與尼古拉第二之俄化步驟，必先明瞭俄羅斯帝國於十九世紀末葉之版圖及其人民。

(一) 俄羅斯帝國之中心爲大俄羅斯 (*Great Russia*)——昔日之莫斯科維公國及其屬地)——一八九七年共有五千萬人口，皆屬同種。講斯拉夫之大俄羅斯土語。且信希臘教。惟境內頗多信舊教者，常成一派；雖爲法律所禁止，然其潛勢力終難消滅。

(二) 小俄羅斯 (基輔，烏拉爾)——*Little Russia*——包括俄羅斯西南部之草原，

及得尼普爾河流域與喀爾巴阡山脈 (Carpathian Mountains) 以東之一部分。人口約有二千萬。用俄羅斯語言，并信希臘教。惟其土語與大俄羅斯異。平民所習文學亦各不同。希臘教外，尚有多數猶太人散居各城，信奉異教。即奉希臘教之俄人亦有兼奉羅馬天主教者。甚爲複雜。

(三) 十八世紀喀德鄰第二所併吞之立陶宛公國 (Lithuania)。其中一部有五百萬人，用白俄羅斯語言，信奉希臘教；另一部，有二百餘萬斯拉夫族之立陶宛人，仍用其土語服飾，并信羅馬天主教。此外則爲少數之猶太人及波蘭之地主。

(四) 南俄羅斯 (Southern Russia)。爲得自土耳其國之領土。其居民多爲大俄羅斯之殖民，——哥薩克人——及蒙古人，與其他亞洲土人。皆信希臘教。比薩拉比亞 (Bessarabia) 爲一八七八年得自羅馬尼亞 (Rumania) 之領土。其人民雖信希臘教，而語言習俗，一仍其舊，且與猶太人雜處其間。

(五) 沿波羅的海之各省 (愛沙尼亞，里窩尼亞，庫爾蘭) 皆爲十八世紀得自瑞典

及波蘭者。其人口可分爲二：農夫多芬蘭人，上等階級及城市中人，多爲德國之移民，仍用德語，且奉德教。彼得格勒城，雖沿波羅的海，但自建都以來，人物蒼萃，大非昔比。大俄羅斯之語言及希臘教之信仰與他處無異。

(六)高加索(Caucasia)，於十九世紀併於俄羅斯。份子頗雜。有基督教徒，亦有回教徒，皆善戰。故始終保守其原有之國民性，不稍變異。

(七)俄羅斯之疆域，漸越倭爾加河(Volga)及烏拉嶺，經亞細亞洲而達太平洋，俄羅斯人居此者約六百餘萬。本地土人約八百餘萬。其語言及宗族各不相同。其信仰則有回教，有佛教，有拜物教，極形混雜。

上述各地之外，猶有二大部分：一爲(八)波蘭王國，一爲(九)芬蘭公國。波蘭自一八六三年叛亂後，遂爲俄帝所併吞。其人口約一千萬。信奉羅馬天主教之波羅人，佔四分之一；餘則爲猶太人，及俄羅斯人。波蘭人臥薪嘗膽，圖謀獨立，彼輩不但痛恨俄人，且排斥盤據各處之猶太人。

芬蘭自一八〇九年與俄合併之後，仍似獨立國家。俄帝統治全部，并設參議院與衆議院，代表各種階級，討論國政。一八九七年，二百一十萬人口之中，大半皆爲業農之芬蘭人，沿用芬蘭習俗。其上等階級多爲瑞典人，用瑞典語言。彼等皆信路德新教，對俄羅斯之侵襲，異常反對。

第三節 俄帝之野心

大斯拉夫主義 十九世紀末葉，俄人極力提倡『大斯拉夫主義』。其時德、意二國之國家主義頗盛，故俄羅斯之一般文人學者及政治家咸稱頌斯拉夫族之偉大榮華。凡斯拉夫族人，彼輩皆設法聯絡，以廣其勢力。大斯拉夫主義約有二義：第一，彼輩擬使俄羅斯帝國內之全體人民，均用大俄羅斯之語言，及其制度；——簡言之，即俄化帝國之全部是也。第二，則爲向國外伸張俄羅斯之勢力——東至亞西亞，西抗德意志，南入巴爾幹。因此大斯拉夫主義者，每於布加里亞 (Bulgaria)，塞比亞 (Serbia)，蒙特尼格羅 (Montenegro) 等弱

小民族，與其宗主國土耳其或奧大利有所爭持時，必表同情，而予資助。其目的不外冀於成功時，獲取相當之報酬也。大斯拉夫主義者，深信俄語，希臘教，農村制，專政四事，爲俄羅斯之國粹；力主傳播全國。俄羅斯人愛專制政治，卽爲愛國。無專制則大斯拉夫主義者，固難實現其全國只有『一種法律，一種語言，一種宗教』之理想也。

俄化野心 欲在俄羅斯帝國實現大斯拉夫主義，其方法舍『俄化』莫屬。尼古拉第一及亞歷山大第二時代，雖或蓄意侵略，然手段終屬緩和。至亞歷山大第三始銳意施行，對被壓迫人民之痛苦及需要，毫不顧及。警務部長普雷味氏嚴禁集會，箝制輿論。聖教會總監坡俾多諾塞夫非但嚴懲希臘教之叛徒，卽對偶然改奉希臘教之異教徒，亦須詳細查究。俄帝不惜三令五申，以行『俄化』。波蘭之中等教育，完全採用俄制。波蘭之文學，均用俄文教授。波蘭人不得參與政治。自一八八五年至一八九七年，禁止以土地售於外人。白俄羅斯及立宛陶二地之宗教，亦皆『俄化』。天主教徒大受壓迫，俄羅斯政府否認彼等之婚姻及子女爲合法。小俄羅斯之著作不許刊印。卽演唱背誦之用土語者，亦必嚴禁之。沿波羅的海各

省，於一八八五年以俄語爲國語，若無聖教會總監之許可，不得建築路德教堂。大學講授，禁用德文；地方法院，痛遭抑壓；出版須禁檢查；即沿用德文之地名，亦必改爲俄文。凡僑民能於高加索及西伯利亞地方傳播并保持俄文及希臘教之威嚴者，政府咸加獎勵。於是「俄化」之成績，乃益著焉。

壓迫猶太人之苛酷 帝國內之人民多感壓迫之困苦。猶太人首遭其創。而俄羅斯近代史上遂貽莫大之玷污。散處歐洲之八百餘萬猶太人中，居俄羅斯者，越五百餘萬。此輩猶太人昔日皆屬波蘭，或立陶宛，小俄羅斯，及比薩拉比亞等處。此數處向稱爲猶太人區域者也。今俄帝欲行「俄化」，對此信奉異教，講說異語，採用異俗之民族，更當反對。猶太人中一般盤剝重利之徒，及謀求無厭之商人，素足引起俄人之憎惡。故亞歷山大第三得利用民衆心理，百方壓迫。一八八二年遂通令禁止猶太人之購地，或經營酒商。普通職業多排除猶太人。卽中等教育，或大學教育，亦須加以數目上之限制：初定爲全部學生百分之十，旋更改爲百分之三。

佩爾(Pol)爲猶太人惟一之法定住所。猶太人已失其擇地居住之權利。一切悉聽政府之命令。住城市者不得移居鄉村，而居鄉村者又須服從無數苛律。排猶太人之暴徒，每假政府之威勢，焚毀房屋，屠殺無辜。猶太人處此環境之下，備受摧殘。於一年（一八九一）之中，逃往外國者，竟達三十餘萬。是爲猶太人僑居美洲之先鋒。

尼古拉第二 一八九四年，尼古拉第二 (Nicholas II, 1894—1917年) 繼其父亞歷山大第三之帝位。年僅二十六歲。曾遊歷西部歐洲各國。頗具才幹。時人皆望其能以進步精神，改造當日之惡劣環境。乃即位未久，遂宣言曰：「吾誓將效仿吾父，盡力維持專制君主之原理。」議會代表之來請願制定憲法及創設國會者，叱爲「愚蠢之夢想。」尼古拉既非如其父之堅毅果斷，又非如其祖之活潑自由；不過一小有才能，略具手腕，而恆爲反動派所利用之常人耳。

侵略之企圖 尼古拉第二時代，波蘭，立陶宛，及波羅的海各省更多怨言。排斥猶太人之法律，嚴厲施行。屠殺事件，層出不窮。一九〇三年，基西尼夫 (Kishinev) 地方之慘案，死

者數千人。西歐各國無不震驚。然其主使者，即俄帝信任之普雷味是也。同時復向國外施行其俄化政策。西歐方面，與法蘭西聯盟；近東方面，於巴爾幹諸國，發展其勢力；遠東方面，則無時不注目於中國之滿蒙，并欲以高麗為俄帝之屬土。一九〇四年之日俄戰爭，即大斯拉夫主義者野心之表現也。

同化芬蘭 芬蘭為一八〇九年兼併之領土。當時曾強其承認俄羅斯皇帝為其大公。雖專橫如亞歷山大第三，猶允其保存舊有之國會及立法之權利；乃至一八九九年，尼古拉第二竟欲施行『俄化』。遣俄人往治內政。改編芬蘭軍隊，直隸於俄羅斯之軍機大臣。除純粹地方事務外，并奪其立法之權。是年八月，復派大斯拉夫主義之忠實信徒普雷味，充駐芬蘭內務大臣。其專制程度，可謂極矣。

第四節 工業革命及其影響

工業衰頹之緣因 俄羅斯之經濟大變遷，始於十九世紀末葉，即所謂工業革命者是。

俄羅斯之變遷，所以較西歐諸國獨後者，非以其缺少天產，蓋彼有多量之煤鐵蘊藏地中也；亦非以其缺少勞働，蓋彼有繁衆之國民足充工人也。然其遲緩之緣由果安在哉？曰，在缺乏資本，與政府之守舊，不肯開闢利源耳。

振興實業 此地大物博之帝國，爲應世界之潮流，將西部歐洲發明之機械及盛行之工廠制度鐵道等，引入國中；以變數百年來之農民生活，而與列強相抗爭。俄羅斯對於建築鐵道甚爲努力。初僅以政治及軍事爲目的。迨路成，煤，鐵，礦山皆得開採運輸。因而工廠獲利良多，驟然發達。當一八八六年至一八九九年，鐵之出產，每年增至四倍，較法國所產者尤多。他種商業之發達，不相上下。工人之數目當一八八七年爲一百三十一萬八千人。至一八九七年，則增至二百一十萬人。旋復增至三百萬人。工業出產品之價值，十年之中，增至三倍。此種驚人之一工業振興，半由勞工低廉，半由鼓勵外人投資之所致。鐵道建築，並駕齊驅。一八八五年時，俄羅斯帝國共有鐵道一萬六千一百五十五英里；一八九五年，共有二萬二千六百英里；一九〇五年共有四萬零五百英里；至一九一三年，則增至五萬一千英里矣。

轟動全球，工程最大之西伯利亞鐵道，亦於一九〇五年竣工。歐洲人之旅行者，自哈爾濱（Harbin）經過巴黎，柏林，莫斯科，哈爾濱，可達海參威。自是俄羅斯之移民，多東向而來西伯利亞。與中國日本之貿易，因亦增加。

工業進步之阻礙 俄羅斯工業革命，雖未將農民生活完全推翻，然其影響所及，頗勞專制君主之躊躇。資本家及勞動階級皆求政府之保障與援助。普雷味則盡全力以阻止俄羅斯之工商業發達。蓋彼以爲工商業之發達，足以產生有害於專政之勞動階級與中產階級，而同時減少屈服於專政下之農業社會也。但其時潮流如此，普雷味無以爲力；於是有維特者出，向衆號召，工業發展上遂留一線曙光。

維特（Sergius Witte）先爲鐵路局長。一八九三年亞歷山大第三任之爲財政大臣。尼古拉第二時代，繼任此職，約其十年。招引國外投資，發展內部鐵道，國庫收入，頓增倍蓰，彼更提倡海外殖民，制訂保護稅則，以發展國內之實業。同時又倡議立法，保護工人。擴張一八八六年頒布之工廠法令內容，強迫實行。政府官吏對於勞資爭持須善意調解。礦工

條例及工人保險規則，亦均經頒行。

然維特政策，頗遭譏評；主張專制政治者，莫不深恨。一九〇三年，俄帝遂罷貶之。反動派乃大得活動。往昔普雷味預料之結果，今日均成事實；蓋工業革命所產生之新勢力，確有碾專制君主之生存也。

地方會議之主張 昔日反對專制君主之舉動，在普雷味及密探監視之下，曾稍斂跡。至二十世紀初年，遂又暴發。就人數觀之，其反對之烈者為大地主及農民。彼等深怨俄帝任維特之意，尊重工商業之發達，而疏略農業。彼等在地方議會中，頗佔勢力，因羣起詰問。維特不得已終須徵求議會之建議。然地方議會泰半皆反對已有之制度，請求設立國會，言論自由，保障人權。此皆貽反動派之口實而足以使維特引退者也。

工人受馬克斯主義之影響 工業既興，工人亦衆。激烈者如哥開 (Maxim Gorky) 遂向新起之無產階級宣傳馬克斯社會主義。一時談者遽起，各大工廠無不有其蹤跡。

一八九八年，城市之中即有社會民主黨之組織。其目的除希望政府立憲，人民自由外，

尙希望工人能據政府之要津，以謀全體工人之利益。此外於鄉村之中，尙有社會主義革命黨。其組織較爲完備。凡政府之抑制人民，或吸收人民脂膏以自肥者，彼輩必擇尤暗殺。恐怖主義及暴烈舉動，遂復流行於俄羅斯矣。

自由主義 其時國內反對政府之第三種勢力，卽由於新自由主義之創興。一方面商界中人與工廠主人，俱信限制君權，及建設代議政府，爲改良經濟之方法。一方面開明之貴族及激烈之智識界領袖，如密利可夫（Milyukov）等，咸表同情於西部歐洲之制度。一九〇二年於德國刊印出版品。一九〇四年組織自由主義者大同盟，遂成政黨。

解放運動 波蘭人，猶太人，芬蘭人，立陶宛人，及波羅的海各省之德意志人，愈受大斯拉夫主義之壓制，愈思努力於反抗工作。凡反對政府之俄羅斯人，彼輩必設法與之聯絡。猶太人多加入社會主義黨。波蘭人多加入自由主義派。芬蘭人則努力於憲法之制編，及排斥俄羅斯人之干涉。

普雷味及其他忠於專制之大臣，爲應付一般反對之勢力，壓抑手段，遂再接再厲。普雷

味(1908—1909)威聲遍全國。搜查私宅，非法逮捕，任意放逐，箝制輿論，無所不用其極。凡有反對俄羅斯嫌疑，及帶社會主義色彩者，政府必逮捕而監禁之，不稍赦也。

第四章 遠東政策與日俄戰爭

第一節 俄羅斯與近東

十九世紀末葉，俄羅斯之外交政策約分爲二：一爲保障巴爾幹之斯拉夫勢力；一爲向太平洋方面作積極之侵略。關於第一政策，苟無國內所有民族之擁護，難以爲力；蓋當日之目的，與亞歷山大第二之欲衛護巴爾幹弱國之目的異，而同時歐洲列強羣相嫉視，深畏俄羅斯勢力之擴張也。是以東侵亞洲之政策，勢更緊張。

俄侵布加利亞 先是巴爾幹之弱小國家，得列強援助，漸脫土耳其其勢力而獨立。俄羅斯因有功於布加利亞 (Bulgaria)，遂百端思逞，橫行干涉。一八八三年，布王亞歷山大不甘爲俄羅斯之傀儡，頗遭俄帝恨。布加利亞與東魯米利亞久思聯合，而俄羅斯從中阻梗。煽動暴民，陰謀叛逆布王亞歷山大。於一八八六年迫之退位。繼位者爲斐迪南 (Ferdinand)，

一親與奧大利之新王也。俄帝甚憤。斐迪南以政權託於大臣斯端布羅夫（Stankholyov）。斯氏乃愛國之士。繼亞歷山大志，力排俄羅斯勢力。俄則仍事鼓惑。斯端布羅夫竟遭刺殺。斐迪南不究叛黨，與俄帝尼古拉修好議和。

尼古拉之詭謀 俄帝在巴爾幹之蠻霸行爲，頗引起西歐各國之深憂；即巴爾幹之斯拉夫國家，對之亦失好感而生畏懼。其待波蘭人之苛虐，尤足使弱小民族寒心。尼古拉第二之野心，遂不得展。惟此時尙發生一事，頗爲常人所忽略者；即尼古拉第二之詭謀是也。當一八九七年希臘與土耳其其爭持時，尼古拉第二密令駐土公使，故意發生危險。俄使傷後，電告俄京。俄羅斯遂動員出師，以便攻取土耳其其附近海峽。幸諸臣極力反對，卒未成功。然尼古拉第二時代，俄羅斯外交之欺詐詭謀，至此遂畢露矣。

俄法同盟 俄羅斯因近東關係，一變其與西歐之外交政策。俄政府對法蘭西共和國初甚厭惡。俄羅斯之革命者又常寄跡法國，故欲俄、法修好，事實上頗多困難。但一八七八年柏林會議結果，俄羅斯大受挫折；及布加利亞王亞歷山大被挾事件，布人遣使乞援於法，法

不之應。時德已暗助奧國，俄遂孤立；法獨不應，故俄深感美意。法國更助俄開發富源，借與國債。俄、法關係，益形密切。尼古拉第二即位時，法國派員往賀，帝親赴巴黎，備受歡迎。法大總統亦赴俄都答禮，卒於一八九七年正式宣布俄法同盟。

此政體迥異之國家所以終能有今日之聯盟者，蓋以法所患者德也，俄所患者奧也。德、奧，在外交上既成立三角聯盟，則俄自不能不另組一團體與之對峙也。

海牙和平會議 歐洲既有三角同盟，與俄法同盟之對抗，列強均暫持武裝和平態度，汲汲以擴張軍備為務。一八九八年，俄軍機大臣鑒奧大利忙於增兵，深憂俄羅斯難以應付。於是尼古拉第二納大臣維特之諫，倡萬國和平會議。以一八九九年五月十八日開會於荷蘭海牙。其目的則為限制各國之軍備，減輕國民之負擔。歐洲政局，得以苟安。

第二節 視為轉機之遠東政策

強俄勢力之東漸 俄羅斯自近東發展感受障礙後，遂變計而為東方之經營。亞細亞

洲北部之浩大平原，中部之多山國家，向爲半開化民族盤踞，俄羅斯所久覬覦者也。東向直達太平洋，佔西伯利亞，威脅滿蒙，及高麗；東南則侵略土耳其，波斯，及中央亞細亞諸部落，惟以英國阻撓，未達印度洋。

侵蝕滿蒙 西伯利亞地廣而荒，俄羅斯之所以佔領者，實因欲得較優之海港。然野心未足，於海參威勢力養成後，復垂涎於滿蒙，高麗；蓋思出黃海以稱雄太平洋耳。一八九五年俄人在滿洲及高麗之勢力頗大。此二地幾入其掌握。日俄戰後，始放棄其特權，因別圖進展而侵蒙古。商民，兵士，移住其間。我國政府，置若罔聞。至一九一三年，外蒙古幾爲俄之保護國矣。

阿富汗事件 英國爲俄國侵略中央亞細亞之惟一阻礙。然一八八二年，英專力佔領埃及，繼以蘇丹遠征，俄趁機乃爲合併木鹿運動。一八八四年，誘木鹿四部落，詣俄請降。俄卽照准，遣兵佔領其地。於是英，俄大起交涉。兩國戰機甚爲迫切，卽所謂阿富汗事件是也。已而雙方怠於戰爭，遂和平解決。英國讓步，俄羅斯遂得累年肆意蠶食。至一八八七年，阿富汗之

木爾加布河 (Murghab) 流域，全爲俄領矣。

波斯 英俄關係 波斯者，亞洲西南之一古國也。十九世紀時，北遭俄羅斯之壓抑，東南遭英吉利之威迫。迨二十世紀之初，俄羅斯之勢力，益形擴張。其商民之在波斯者，皆受一九〇二年俄、波商約之保障。故俄之資本家前往投資者，爲數頗多。一九〇〇年，波斯借俄羅斯之債，竟達一千二百萬元，卽其明例也。俄之資本家復獲得建築鐵道之特權，威勢因以更張。但英吉利商民之經營，於波斯南部及亞丁灣 (Gulf of Aden) 者，咸畏俄將盡吞波斯，而有英商之進行也。故一九〇七年八月三十一日，英、俄正式協約，劃波斯北部爲俄之勢力範圍，而以其餘爲英之勢力範圍，互相尊重對方之利益。

中日戰爭 會東亞新興之日本恃其淫威，於一八九四年大敗我國。進兵滿洲，逼我承認高麗之獨立，并割據旅順口及臺灣。遼東半島中之旅順及大連兩港，本爲俄羅斯久欲染指之地，今爲日佔去，殊不甘心，遂聯合歐洲各國起而干涉。

俄法德三國之干涉 是時法在雲南，雅不欲再肇事端；又與俄爲同盟國，其助俄固宜。

德，法爲世仇，法與俄合，恐俄人助法制德。其勢不能不參入干涉之，以示親俄。三國代索遼東之舉，因以成立。時俄人已洞悉日本之虛實。陸軍留守於遼東，海軍游弋近臺灣。精疲力盡，勢難再戰。其機可乘。俄人密遣太平洋艦隊，積極備戰。德、法二國，亦莫不然。倘戰燬一起，海路斷絕，遼東之日軍，決難生還。日皇慌於衆怒難犯，不得已將二港交與中國。清廷加付賠款三萬兩與日本。孰料遼東雖假外力而復歸中國，日後竟爲中俄密約之資料，及各國租借軍港之先導耶！

道勝銀行 俄羅斯固以長於外交名於世者也。其對中國尤汲汲不忘；無奈羣強環視，計不得售。乃先餌誘我國代借外債。先是清廷自中日戰後，既耗軍費，又賠鉅款，國庫空虛，理財乏術，不得不添募外債。然俄之財力有限，不似英、法、美之富庶，遂運動法國之銀行家，代辦一萬萬兩之借款。更設俄清道勝銀行，以操縱華北之經濟。

中俄密約 一八九六年俄皇尼古拉第二行加冕禮，各國皆派專使往賀。清廷亦循例派遣。俄使堅欲李鴻章充任使臣，清廷許之。及李抵俄都，俄政府即面索助華退還遼東之報。

酬。加冕之日，復勒令李鴻章簽字，贊成俄政府預訂之計劃。當其開議之始，俄人恐外國之干涉，破壞祕密之條約，乃假託籌借國債之名，使內務大臣任其事。所訂條文，極形苛刻。關於鐵路，則俄人獲得滿洲之築路特權。關於礦務，則黑龍江及吉林長白山等處所產五金之礦，准俄國開採。關於軍港，則許俄租借膠州灣，得停軍艦；旅順口，大連灣不得讓於他國。但亦許俄停泊軍艦。關於兵權，則俄兵得駐鐵道近傍，以資保護。諸如此類，不一而足。關係中國絕大之事，今竟斷送於樽俎之間，可勝浩歎！

滿洲 閱二年，俄羅斯強向清廷租借旅順口，大連灣，訂期二十五年。於是俄羅斯遂得其多年希望終歲不凍之海港。旋藉此為根據，將建新俄羅斯於滿洲。翌年，忽欲置關東省於遼東半島，頒行治民律，稱哈爾濱市為首府。又經營其所握之東清鐵道權。每十里必建屋，駐哥薩克兵。雄心遂遂，已不視滿洲為中國之領土矣。

中國拳匪之亂 中國歷受歐人侵略之橫暴，遂有排外思想之醞釀。一九〇〇年，拳匪亂起，焚教堂，殺教徒，勢甚猖獗。英俄等八國聯軍來攻。七月間，俄日軍隊克天津；八月，聯軍陷

北京。俄之軍隊，淫掠無忌。雖曰勝利，名譽掃地，迨訂和約，俄租借旅順口，期限爲九十九年，并獲大宗之賠款，（一三〇，三七一，一二〇兩。）西伯利亞鐵道亦得伸長至旅順口。

高麗 俄羅斯猶進兵未已，其時內務大臣爲柏左坡拉左夫（Bezobrazov），遠東之一探險家也。遠東政策，旋竟操諸柏氏一人。違背尊重高麗領土完全之條約，強佔租界。其後又奪得鴨綠江流域中之林業權。俄軍於拳亂平定後，仍徘徊滿境，迄未撤退。其佔領野心，不難窺破。一九〇二年，礙於列強之督責，與清廷締結交還滿洲條約，願將滿洲之主權，交還中國。軍隊則於十八個月內，分爲三期完全退出滿洲。然撤兵第一期不過略減人數，至第二期不獨不撤退，且於吉林省極力增加。英、美、日，三國羣起質問。俄人不得已，乃轉向高麗進展矣。

英日同盟及其精神 當俄羅斯霸佔滿洲之時，日人汲汲自危，日使小村壽太郎在北京屢與英公使相提攜，以示友善；蓋三國干涉遼東以還，日本以英國并未參加干涉，故願與之接近。及拳匪起，乃誘英國託日本出兵，故英國首相曾函其友，謂能出兵至天津救西人出險之國，惟有日本，且擔保日本無他意，爲之籌備軍費。英、日友誼，於是頓形密切。其時英國對

極東政策，亦甚積極。但無進取意，若能與俄羅斯之勢力均衡，已可云足。不料俄既囊括滿洲，復在西藏一帶，蠢蠢欲動。使節往還，英爲之憂。西藏者，英所認爲己之利益範圍也。俄既如此，不得不速結同志，以謀對付。由是英、日二國，實際之同盟遂成。一九〇二年一月三十日，締結條約。兩國承認中國及高麗兩國之獨立。兩同盟國約定，兩締約國之一方如受第三者攻擊，他一方之締約國，須直接援助。倘使一締約國向第三者攻擊，他一方應守中立。

英日同盟之意義 英日同盟之精神，名義上爲保守中國及高麗之獨立，實則恐英、日兩國在中國及高麗之利益，爲俄羅斯所侵害。故必締結同盟，以抵禦之。其約文中，首述締約國之利益，因他國侵略，或因中國、高麗內鬪，而受損害時，得以獨斷執行必要之手段。其處心之毒，可以想見。非特此也，遇有締約國之一方與第三者交戰時，對方應援助本方。消極方面應停止接濟敵國。一旦太平洋中，日俄若有戰爭，自易操勝券也。揆其真意，亦無非畏法德之助俄羅斯耳。

俄法擴張盟約

英日同盟之效用，原在維持東亞之和平。故同盟條約發表，各國多無

異議。惟俄羅斯以英日同盟，足使遠東之勢力，變爲孤立。前途發展，不無阻礙。故將昔年爲歐洲政略所結之俄法同盟關係，實用於遠東方面。三月十二日，特宣告擴張盟約之內容，謂俄法二國在遠東之特別利益，因第三國侵略行爲，或中國內闕，而受侵害時，兩國政府得取防衛之手段。至此俄法同盟與英日同盟，針鋒相對，均衡其在太平洋上之權勢矣。

第三節 日俄戰爭

日俄宣戰 拳匪之亂雖終，而東亞仍密布戰雲。自俄羅斯佔據旅順口及擴張其在南滿洲之勢力後，不特能制中國於死地，即日本立國之基礎，亦必因其控制黃海，日本海而爲之動搖。故一九〇二年，英日同盟後，即與俄羅斯直接交涉。從此中俄爭持之滿洲，一變而爲日俄爭持之滿洲矣。日本屢次提出抗議，迫俄退讓滿洲，尊重高麗之領土完全，而交涉迄無要領。乃於一九〇四年二月五日，與俄羅斯斷絕國交，命駐俄公使下旗歸國，即日開始戰爭。



歐洲俄羅斯之東境，有三千英里之遠。處此萬里不毛之荒原，其交通機關，則惟一線單軌之西伯利亞鐵道。至於日本自明治維新後，立志圖強；中日戰爭，日本費無數金錢，耗無量血汗，經二年之艱難辛苦，所得之遼東半島，因三國干涉不得已而讓出。臥薪嘗膽，每思報復。其海軍以俄海軍爲標準。故優於俄羅斯。今者戰場距離殊近，呼應較便，當更勝俄一籌。

鴨綠江之激戰 日本自開戰以後，先敗俄羅斯之海軍於旅順口外，俄軍遁入港中，不敢輕出。日軍乃得乘機於仁川上陸，擊沉停泊該地之俄艦二艘。旋率聯合艦隊，由高麗趨鴨綠江。轄重隊冒彈丸，趕造渡橋，日軍次第渡河。五月一日行九連城總攻擊，佔領摺鉢山，攻克腰溝，馬溝，榆樹溝；石城亦破；九連城全陷。是役爲日俄陸軍第一次激戰。勝敗攸關全軍，士氣勇毅百倍。於是難攻易守之九連城一戰而歸日有。乘勢乃向遼陽進發。

日本海戰勝利 日本大本營作戰計畫之重要點；一出雄師團至關東州，一制黃海，日本海之海上權。爲欲達此目的，遂實行封閉旅順口，使俄艦不能出港。然俄艦屢圖脫逃，皆被包圍擊敗。海參威艦隊，雖亦來戰，但均潰散。於是極東俄羅斯之海軍力，大受損失；海上權全

歸日本所有。

當鴨綠江戰捷之後，日本第一軍即略鳳凰城等地。第二軍亦陷金州。九月破遼陽。俄軍大驚，集守奉天。俄皇諭告大將苦魯派鐵金 (Krupatin) 速恢復遼陽，以救旅順之急。日軍仍猛禦之，於沙河附近。兩軍死傷枕藉，其情至慘。

旅順之投降 其時日本大將乃木希典圍攻旅順口，旅順俄軍以勇毅之軍隊，精利之武器，嚴守太平洋之第一天險要塞。屢以猛烈礮彈，殲滅日軍將卒無算。日軍仍奮往直前，終得逼進戰線內，於十二月杪連佔鷄冠山，二龍山，及松樹山。至翌年一月一日，旅順口之俄羅斯軍隊力不能支，而降。

奉天之役 此後陸軍之大戰，惟奉天會戰之一役。依日將作戰計畫，戰線可四十餘里。兩軍總數達八十五萬，大礮二千五百，蓋一大戰爭也。三月間，日軍以全力攻奉天，陷焉。是役也，日軍死傷總數，達四萬二千二百名。俄軍死戰場者，約及三萬；被掠擄者，四萬以上。其激戰情形，概可想見。苦魯派鐵金以戰敗辭職。大將黎尼維齊 (Linevich) 代之，以恢復敗軍秩

序，不遵作戰；日軍乘機追進，又佔地多處。

俄海軍之覆滅 當海參威艦隊破滅，及旅順圍急之時，俄羅斯政府決意派遣波羅的海艦隊，遠赴東方，以解旅順之圍。一九〇五年五月中，抵高麗海峽，過對馬海峽。數小時間，其軍艦之被日本海軍上將東鄉平八郎擊沉者，達二十一艘，捕獲者七艘。至是俄羅斯之海軍，可謂全軍覆滅矣。

泡子茅和約 俄既敗績，日亦不利於久戰。美國大總統羅斯福根據海牙和平會議約章之規定，設法調和。兩國政府皆應其勸。斯時日本恃其戰勝，欲凌俄國，將要求賠償軍費。然俄羅斯以日軍雖勝，但未進俄境一步；且深知日本精銳士卒悉盡，庫支空虛，豈肯甘拜下風，以戰敗者自居耶。故日俄談判，日方頗難順利。兩方公使先後抵美國 New Hampshire 省之泡子茅 (Portsmouth)。九月五日，和約告成。俄羅斯承認高麗之獨立，撤退滿洲兵，海參威幹線作為非軍事鐵道。由俄羅斯保管。此外并割讓薩太島 (Sakhalin) 南部之地，又讓與旅順，大連租借權，及哈爾濱以南之鐵道。此次雖為日俄間之和約，而實際上則多涉及中

國。遼東半島隱爲日本之勢力範圍。吉林、黑龍江二省，仍不能脫俄羅斯之關係。然日本既抗過強俄，得列世界強國之林，雖耗巨金，死將士無數，亦足償所失矣。

第五章 一九〇四年後之解放運動

第一節 日俄戰爭以後

戰爭之影響 一九〇四年二月五日，俄羅斯與日本之戰燬既起，國內維新黨人，多以此種戰爭原於官吏處置之失當，頗為不滿。赴戰兵士，多思逃竄；但軍法森嚴，只得肩槍攜彈，遠涉遠東。兵變劫掠，時常發生。海軍有中途反戈助革命黨以起事者；惟勢孤力微，卒未有成。其時軍隊尤腐敗異常。軍需及紅十字會基金，多飽入高級軍官及皇室貴族之私囊。人民雖怨而不敢言。迨日本戰敗，俄羅斯之陸軍，殲其海軍，圍攻旅順口。俄羅斯帝國之軍事基礎，全行動搖。此種戰爭失敗之恥辱，政府腐敗無能之表徵，均足使革命黨人得機宣傳，推翻專制政體。數月之內，人民議論紛紛；出版言論，皆得一時之自由。民衆復持械游行於彼得格勒及莫斯科等處。且高呼『停止戰爭』、『打倒專制政府』。然政府方面，固未料戰爭之結果竟

如斯也。

普雷味及其被刺 其時內務大臣爲普雷味，俄羅斯人所切齒痛恨者之一也。彼自一九〇二年得權後，始終施行苛政。吾人固已知其殺戮維新黨人之殘忍，壓抑芬蘭人之嚴酷，及唆使暴民屠殺猶太人之苛虐矣。然彼於日俄覺起，屢戰屢敗，人民憤激之際，猶不稍自覺悟。公共之聚會也，必嚴禁之；新黨之集議也，必放逐之；國人益忿恨不平。一九〇四年七月二十八日，遂有莫斯科大學畢業生某，拋擲炸彈殺普雷味於途中之舉。俄民皆大歡喜。革命社會主義黨之中央委員會宣告世界民衆曰：『吾黨誓死推翻專制政體。今次殺普氏者，卽爲吾黨。所以暗殺之者，則爲普氏壓制太甚，不許人民有絲毫之自由。』其結論謂：『吾輩之暗殺舉動，絕不違背正義。若在文明自由之國家，探此方法者，吾輩必極反對。然在俄羅斯，君主專橫若斯，人民又毫無權利得以矯正腐敗之政府。故今日之出此，實乃利用革命勢力而與專制政體一決戰耳，不得已也。』

尼古拉第二傾向自由 俄帝尼古拉第二之態度，漸趨緩和，一洗普雷味時代之苛虐。

政策。九月間，令米耳斯啓（Mikhail）任內務大臣，新大臣曾宣布方針，略謂：俄羅斯今日雖仍不宜遽採立憲政體，然地方議會則應與以較廣之言論，及行動自由。善良之政府，當視人民對政府之信仰心如何而定。此項議論頗受維新黨人之歡迎。於是出版獲得自由，人民可發表輿論，及各項請求。一九〇四年十一月，各地方議會得推選代表，集會於彼得格勒，以討論國家之急務。其他團體，亦能作如此討論。諸如律師，文人，學者，市議會，及各種專門人才，皆批評當時政治社會之腐敗，並請求改良。此種自由情形，為俄羅斯歷史上空前之現象。數月前當普雷味時代，此種集會非但必令解散，且其參與會員，亦當嚴重懲治。

維新人物之請求 就報章或雜誌上發表之言論觀察，維新黨人之意見頗為紛歧。然亦有數點相符合者，彼等俱要求俄羅斯應以法律治國。以前之慘刻警察制度，應即取消。彼等要求西歐人民所享之公民權利，即信教，言論，出版，集會，結社，公判等等之自由。彼等更要求政府准許人民應有參與地方政府之權利。政府須建設國會，制訂國家之法律，並組織憲法會議，以編造根本憲法。後二項之要求——組織憲法會議，編造憲法，國會制訂法律——

比較上爲最重要。但無論如何要求，俄羅斯皇帝絕無允諾之意。是以人民怨恨難釋，加以俄戰爭不利，激憤尤甚。

國內之騷擾 是時俄羅斯軍隊，正爲日本戰敗；故國內之秩序大亂。後備軍之逃往德意志及奧大利者有之，被逼而開往戰線者有之。及奉天南部失守，兵士復被逐北退。狼狽情形，足使國內不安。其時商務受戰爭影響而虧損者甚多。失業之工人，更不可勝計。加之收穫欠豐，民生益困；焚毀房屋，罷工，暗殺等事，常有發現。

紅禮拜日 革命運動，繼續不息。戰爭愈烈，革命之呼聲亦愈高。一九〇五年一月二十二日，發生一極可怖之事；即世人所傳之『紅禮拜日』是也。時有多數工人，由一急進派之牧師名干朋（Gapon）者領導，齊赴彼得格勒之皇宮，以便於俄帝之前，親陳民瘼；蓋若輩對其廷臣無信任心也。不意哥薩克兵驅散鞭擊，而禁衛軍竟實彈射擊。人民死傷無算。

一九〇五年間，騷擾混亂之事，幾無日無之。米耳斯啓措置未當，反動派又起誹謗。內務大臣一職於二月間更易布立昆（Buligin）。昔年之舊觀，再次復活。政府方面，仍事慘殺

與壓迫。革命黨方面，則報以暗殺與暴動。工人同盟罷工之舉，時有所聞；農民則焚燒貴族宅舍。海陸軍之兵變，亦層出不窮。俄皇之叔塞澤阿斯大公 (Grand Duke Serzhis) 素主專制，於二月十七日亦被暗殺。此時俄羅斯幾陷於無政府之狀態矣。

一九〇五年八月宣言 俄帝為緩和反對思潮起見，不得已於八月十九日宣言，召集人民渴望之國會。限一九〇六年一月以前開會，由全帝國內之人民代表組織之。但關於君主之權利，勿準討論。此宣言仍使赤心革命者失望；蓋此國會，名雖代表全國國民，實則不過一立法之諮詢機關。其選舉皆操於人民所痛恨之貴族手中。工人與從事於專門職業者，皆無選舉之權。國會之會期，並無一定。選民人數之少，出乎意料。僅就彼得格勒一地而論，其人口在一百五十萬以上，能有選舉權者，不過九千五百人而已。

同盟罷工 革命黨人既不滿意於俄羅斯皇帝之辦法，遂繼續努力，以求貫徹原有之主張。惟徒手人民，勢不能與政府之齊全軍隊抗，故唯一辦法厥惟同盟罷工，以強迫政府順從民意。一九〇五年十月，俄羅斯同盟罷工發生，國內鐵道、航路，停止行駛。交通立即斷絕。旅

客祇得繞行於大道或河流之中。商務停頓，商人不能貿易。凡大工廠皆行罷工，商店除售賣民食者外，一律罷市。大城之中，煤氣，電氣，來源斷絕。藥房在政府承認革命之前，不售藥品。大學學生罷課。律師罷業。司法機關亦只得停止工作。新聞紙亦中止出版。其紊亂之狀，有不堪言者。

十月宣言 此種狀況，足使社會發生危險，但能促政府之反省。俄羅斯皇帝迫不得已，於一九〇五年十月三十日，宣言允許與國民以言論信教及集會之自由，擴充選民人數，至永久選舉法，則當取決於將來之國會；最後並謂以後未經國會贊許之法律，不能發生效力。人民代表對官吏之行動，得有監察權利。維特即任總理大臣。二十年來人民所疾首痛恨之坡彼多諾塞夫卒被罷免。人民稱快。

人民要求憲法會議之結果 但警察及貴族，仍欲施行以前之慣例，——解散集會，戕殺平民，任意逮捕。——人民方面，對俄帝允許各事，本不滿意；蓋彼輩所望者，尤在憲法會議之成功，以確定人民應有之權利自由，而不為警察等再來蹂躪。俄帝不許。十一月間，遂復有

罷工事件發生。新加入之團體甚多；郵差及電報司機乃其顯例。海陸軍兵變，及羣衆毆擊猶太人等事，時常發現，爲西歐各國所譏誚。莫斯科及其他地方，屢有巷戰。政府一面雖不許組織憲法會議，而一面又下令進行選舉國會議員。政府更允許芬蘭得享昔日之權利，以安其心。然俄羅斯終不免內鬪。反動派極欲奪回已失之威權；維新派則思如何防止舊勢力之恢復。其時暴虐政治，在俄羅斯固未嘗斂跡。一九〇六年，報館之被封者，達七十八家；記者之被捕者，五十八人。百姓之被監禁或放逐於西伯利亞者，動以萬計。俄羅斯境內一大部分，均頒行戒嚴。凡此諸端，皆爲尼古拉第二於十月宣言，允準人民得享自由權利後，所發生之事也。

帝國參政院 俄羅斯皇帝已允許召集國會，以爲制訂法律，及監察官吏行動之機關。但未及實行，遽而變卦；忽下令組織帝國參政院，以爲立法機關之上議院。其議員則爲貴族廷臣，或與舊勢力常相接近之人。法律之成立須經參政院與國會共同之贊許。此種制度猶如西歐各國之兩院立法制。

革命運動之衰微 十月黨 一九〇六年之革命潮流，益形澎湃。惟以種種關係，其實

力反較消滅。一九〇五年九月，日俄戰爭媾和後，前敵之軍隊均調回國內，以鎮壓後方。俄羅斯人民經過兩年之戰爭，及國內之混擾，咸思太平，極欲發展商務，以維持社會之秩序。是時，革命份子漸趨瓦解，終日黨爭，精力徒耗，非但社會民主黨及社會主義革命黨，意見紛歧，各樹一幟；即自由主義之維新人物——從事於專門職業者及地方議會議員——亦因憲法問題別爲數派。其著者有民主立憲派（Constitutional Democrats）領袖爲密利可夫教授。此派主張急進，世人稱之爲青年黨（Cathars）。對俄羅斯皇帝之允許自由命令，認爲不滿；要求第一次國會，應制定憲法，建設一完全平民化之議會，以便執行最高之立法職權，並監督君主及廷臣之行爲。又有十月黨者（Octoberists），爲保守自由主義派。其黨員多爲地方議會之議員。對俄羅斯皇帝之十月宣言，並無異議。彼輩以爲國會之設立，乃爲約束專制政體，非欲取而代之也。青年黨人之目的，在根據平民政治之原則，建設立憲政府。十月黨人之目的，則爲根據神聖皇帝之允許，而建設立憲政府。就大體論之，青年黨人主張波蘭自主，以爲俄羅斯應採取聯邦式政府。十月黨人則受大斯拉夫主義之影響，欲行愛國之俄化。

政策。

反動派之團結 各大地主見鄉村秩序紊亂，頗爲驚駭；深恐將來國會組織成功，將沒收若輩之財產；故聯絡反動之皇族軍隊中之官員，及守舊之大斯拉夫主義者，共同合作，以阻止最近頒布之法令，並維持其威嚴酷厲之專制政體。反動派合組『俄羅斯人民大同盟』。於一九〇六年起始活動。

反動派之恐怖主義 自一九〇四年至一九〇五年，俄羅斯本有革命黨之恐怖主義，暗殺廷臣，剷除奸吏。今日則有反動派之恐怖主義『俄羅斯人民大同盟』僱用暴徒，組織黑百黨 (Black Hundreds)，專以殲滅維新黨人，騷擾村鎮及虐殺猶太人爲事。

第二節 國會之權限及其產生

限制國會權利 司托里濱爲相，是時革命勢力，既日漸散漫，而反動勢力又逐步加增。政府遂乘此機會，恢復其舊日之權利。一九〇六年三月，俄帝下令組織帝國參政院，以充

國會之上議院後，即正式宣布其方針：國會不得討論國家根本大法，與立法機關之組織法；指揮海陸軍及決定外交政策，乃俄帝應享之特權；國會散會期間，各大臣得頒行臨時法律；交涉借款事宜，應歸財政大臣負責並規定，國會若不將新預算案通過時，政府得以當年之預算案繼續施用。至一九〇六年四月，俄帝受黑百黨及反動派之包圍，罷貶維特，而以保守之反動派名哥立米金（Gorevkin）者繼相位，以司托里濱（Peter Stolypin）充內務大臣。司托里濱者，新閣中之健將，一九〇六年至一九一一年間，著名之官吏也。一九〇六年七月，繼任總理大臣，竭力周旋於專制政府，及國會之間。一面拒絕主張廢除國會之反動派，一面對革命者之犯罪，嚴重懲辦。

第一屆國會 議員派別之分配 第一屆國會之選舉期爲一九〇六年三月與四月。至五月六日遂舉行成立典禮於彼得格勒之冬宮。議長爲著名法學家墨魯塞夫（Marontsov）。開會日，俄帝尼古拉第二親自蒞場訓話，勸勉各議員努力恢復俄羅斯之文明，並擴張其威權。但本屆國會議員，雖非由人民直接選舉，而反對政府者竟居多數。五百二十四個議

員中，有二十八人爲十月黨黨員；一百八十五人爲青年黨黨員；一百人爲勞動團體 (Labour Group) 份子；餘則爲國內之民族上及宗教上之代表。反動派及社會主義革命黨均未當選。前者因贊助人太少；後者則因反對欽定之代表法，故不加入。

人民之要求 其時議員之希望甚奢。首先要求俄帝大赦政治犯。某議員曾演說曰：「俄羅斯國第一次代表大會之第一主張，應注意於「爲國犧牲之志士」。但政治犯之被赦者，僅其一部而已。其次要求改良帝國參政院之組織，蓋皇帝既有權操縱此第二院，則人民議員之工作，隨時有被取消之虞。其次要求大臣應對國會負責，俾人民得實行其監督官吏之權。其次要求國內之戒嚴法，宣布解除，並通過議案，廢止死刑。最後議員爲謀農民之利益起見，更要求土地之屬於國家帝族及寺院者，須允與農民永租，以免農民之屢被壓迫。」

國會批評政府 國會開會兩月有餘，議員爭辯斷斷，辭意精密。農民以此而享盛譽者頗多。議員對於政府之劣跡，大肆批評，毫無顧忌。會中恆起波折，各大臣之地位，不若昔日之尊重。然帝國參政院與俄羅斯皇帝，多方阻梗，務期破壞。

解散國會 國會中爭論之點，即內閣責任問題。國會要求內閣對國會負責，以便人民真正參與政治。但俄帝堅持拒絕，會議因而停頓。民衆大起恐慌，秩序紊亂。農民之激烈者，要求國家立將國土無條件的分配於農民。俄羅斯皇帝見大勢不利，遂毅然於一九〇六年七月解散國會，認爲絕對失望。並謂：『國家之代表，今棄其本職，舍立法事業之討論，而涉及彼權限範圍以外之事，殊屬違理。且地方官長之行爲，皆受朕命；國法之缺陷，僅朕一人能有修正之權；今國會亦欲干涉，焉得不解散之。』故訂一九〇七年三月七日，重召新國會，以解決糾紛。

威堡宣言 議員於國會解散後，多赴芬蘭之威堡 (Viiborg)。共發宣言，反對解散國會。宣言之署名者，達二百三十人之多。彼輩鼓吹國民，『力爭人民代表之最高權力；且勿服務軍隊，或繳納捐稅。凡未經國會通過之債務，概不承認。但人民非漠不關心，卽畏懼皇權；故宣言雖出，而結果毫無。政府乃變本加厲，凡署名於宣言者，暫時褫奪公權，不准當選爲第二屆國會議員。然歷時未久，此輩爲民衆爭權利之人，竟被放逐或被斬決矣。』

第二屆國會解散 一九〇七年三月五日，第二屆國會正式成立。其意念亦不能與政府一致。國會與內閣之意見，瞬即離異；惡感愈烈。政府卒捕議員十六人，並宣布其他散播革命傳單者之罪狀。於是議會復受打擊，頗遭反動派之口實。政府乃防患未然，於一九〇七年六月十六日，解散國會；下令於九月進行新選舉，於十一月再次召集。

俄帝之意見 同年六月，俄羅斯皇帝上諭謂，兩屆國會皆未能真正代表人民；蓋以「選舉法之不完善，足使一般不能代表人民利益之人，當選爲議員也。」俄帝復宣稱，只有「一人能創制或廢弛法律；因『上帝曾與吾輩最高之君主權力；俄羅斯之命運，皆屬天意。』」

新選舉法 編制法律須經過國會之通過。此乃各國立法之常規。今俄羅斯竟違背此立憲精神，獨自改正代議制度，並違反民治原理，按階級與家產限制投票資格。然考此新選舉法之由來，不外二大緣因：（一）減少俄羅斯以外民族之代表人數；（二）增加有地產之貴族代表。波蘭代表人數由三十七減至十四；高加索代表由二十九減至十；至於得選派代表爲國會議員之城市被裁減者，亦有二十處之多。國會議員額數，茲僅餘四百四十二人。

其選舉方法，較昔複雜。將人民分爲四個階級——地主，商人，農民，工人。每一階級得舉覆選人若干，組織議員復選機關。由此機關再產生國會議員，但代表之分配法頗欠公允，蓋地主佔復選人百分之六十，農民佔百分之二十二，商人佔百分之十五，而工人則僅佔百分之三。選舉事宜完全操之於官吏。各處傳播保守主義。凡反抗政府者，咸遭壓迫，極難當選。於是希望能於一九〇七年十一月十四日召集之國會，全爲保守舊黨所包辦。間有三維新黨員，亦不過寥若晨星；政治上無有勢力也。

政府之反動政策 司托里濱時代之政府，頗着力於國內之秩序問題。反革命運動乃益激烈。一九〇六年至一九〇七年間，恐怖主義者曾殺害官吏，約四千一百三十一人。一九〇八年約一千零九人。司托里濱與之對壘。一九〇七年，因政治關係而被懲禁者約二千七百餘人，殺戮者約八千餘人。一九〇八年經軍事裁判，處決死刑者達八千餘人。其被放逐邊境者，達一萬四千餘人。其時有老革命黨員，名蔡克夫斯基（Nicholas Tchirikovsky）者，因三十年所犯之罪，而被監禁；旋經英美二國友人之保釋，始得放出。一著名之女革命黨員

年已七十，亦被放逐於西伯利亞之荒原，可謂酷矣。反動派之恐怖主義者，爲『黑百黨』。若輩排斥猶太人，並激起暴動，以逞其志。芬蘭亦滿佈反動勢力。一九〇九年諭令芬蘭議會停止管轄其軍隊勢力，並宣稱芬蘭大公應遵從俄羅斯政府之意志。一九一〇年俄羅斯政府擴張國會之權利，得制定關係芬蘭內部事體之法律。芬蘭之自由，因而摧殘殆盡。歐洲各國議會羣提抗議，謂此種辦法有背自由平等之原理，足徵當時輿論之一斑。同年，國會曾通過一種規定，波蘭選舉權之法律案，而爲帝國參政院所拒絕。俄羅斯政府據憲法中『緊急之際，』一條爲基礎，以俄帝之命令宣布此種法律案爲法律。於是國會以二百零二票對八十二票彈劾司托里濱。其時國民之恨司氏，不亞於恨普雷味。多次暗殺皆未果。卒於一九一一年九月十四日，當司托里濱在基輔一戲園中時，被刺身死。刺客名波格洛夫（Bogrov），猶太人，素充律師。司托里濱死後，繼其位者，爲科科夫塞夫（Kokovtsev），乃當代著名之經濟學家，亦反動派也。

第三屆國會之成績 第三屆國會之壽命，不過五載，於一九一二年六月停止開會。自

一九〇七年，國會通過數件極有價值之議案。其一，爲一九〇九年通過者，乃承認一九〇六年十一月俄帝之命令，許農民得享有所分得之土地，並免其繳價。以前之村落公產制度，因而廢止。此項議案，有如亞歷山大第二（一八六一年）釋放佃奴令之裨益平民也。其一，爲涉及工人保險計畫之議案；其一，涉及地方司法制度之改良；另一，則涉及如何以希臘教會管理小學教育。總之，此第三屆國會逢關於大斯拉夫主義之提案，必援助而使成功。立法排斥猶太人，並立法阻止波蘭人之民族運動。其尤甚者，則爲一九一二年國會通過議案，贊成增加五萬萬盧布之特別支付，以建設新海軍。

第四屆國會 一九一二年十一月二十八日，第四屆國會召集開會。社會民主黨佔十四名，與上屆在國會中所佔額數相等。工黨佔十名，較前減少四名。其他各黨派地位，無甚變化。關於內閣提出之干涉波蘭一案，第四屆國會與帝國參政院稍有衝突，不久即解。政府嚴禁運酒，並主張延長軍隊服務年限爲三年零三個月。（昔爲三年）國會均表贊同。至一九一四年二月，尼古拉第二以七十老翁哥瑞米金（Gorenkyin）代科科夫塞夫爲總理。

大臣。於是俄羅斯之政治組織乃得平衡，亦可標以「專制皇帝治下之君主立憲國」矣。

芬蘭問題 一九〇五年芬蘭之革命，對於俄羅斯之專制政策不無打擊。一八九九年之憲法經俄帝廢弛後，芬蘭人幾無日不思恢復其自由。一九〇五年十一月，實行同盟大罷工。火車、輪船、電話、郵局等，均停止工作。首府赫星法斯（Helsingfors）除販賣食品店鋪仍照常開市外，其他商店皆一律罷市。俄帝尼古拉第二以日俄戰爭及俄羅斯內部革命運動之影響，不得已，允許芬蘭人恢復昔日之憲法，並廢除自一八九九年至一九〇三年間之一切苛刻條例。此一九〇五年十一月事也。

芬蘭新議會 芬蘭重起糾紛 自是芬蘭乃恢復自由，組織其自主之政府。一九〇六年五月經俄羅斯皇帝批准改良代表制度。昔日之四級議會，今改為單一議會。由議員二百人組織之。採用普選制度，無論男女，達二十四歲者皆可投票選舉，亦得被選為議會議員。其第一次選舉時期為一九〇七年四月。二百議員之中，有社會黨黨員八十八人，女子十八人；別開生面，為俄羅斯破天荒之新紀元。然一九〇八年芬蘭又起糾紛。芬蘭議會之權限問題，及

芬蘭與俄羅斯之關係問題，先後而起。俄羅斯政府因芬蘭對帝國之支出無何擔負，而國家立法若不使各地一律遵行，則有危險；故對於芬蘭之軍事及財政均欲直轄。芬蘭人則堅守憲法所與之權利，不肯稍讓。是以至一九〇九年之末，芬蘭一隅幾完全變為自主之國家。

第六章 歐戰與俄羅斯大革命

第一節 俄奧交惡及其影響

歐洲之局面 自柏林會議以還，歐洲境內幸能保持一種岌岌可危之和平者，垂三十年。此時期中，各強國間雖無戰爭；然固已互相傾軋，互相猜忌，其未即以兵戎相見者，幾希。俄帝尼古拉第二，自一八九九年召集萬國和平會議於海牙後，聲望隆隆日上，洋溢寰宇。至一九〇七年復召集第二次和平會議。全世界之獨立國，幾無一不有代表參加。惟各代表皆因外交關係而來，未嘗有世界共同之見解爲其思維之指針。普通民衆，更不知世上有此等會議之舉行。列強咸畏此後若有戰爭，耗費至鉅。故欲藉此減輕其代價。非不得已時，務以創設之國際新法緩和之；不使戰爭衝突之發生也。

英俄邦交 二十世紀初葉，俄羅斯之外交方面，固有俄法之同盟矣。其目的先不過爲

謀商業上之聯絡，攻守時之助援；俄羅斯人對之無甚注意。迨俄羅斯革命事起，俄法同盟遂成其導線，國內新黨黨員多仰給法蘭西之補助焉。其時英法修好，感情漸洽；英人以此遂能在俄羅斯自由營商。日俄戰爭時，英國雖爲日本之同盟國，然因斯戰本爲俄國人士所反對，故英之商業，得以無恙。

俄德關係 惟德意志深爲俄羅斯人民所怨恨；蓋德意志乃唆使尼古拉第二實行遠東政策，而自身則乘機代俄羅斯以侵蝕巴爾幹者也。德皇甘言籠絡，伴倡親善。一九〇四年之俄德修正稅約，毫不顧及俄羅斯之利權。一九〇五年七月，德帝威廉第二百方諂諛，俾得俄國之援助。其時德意志欲奪世界之海上權，故訂約聯合俄法，以抗英國。然俄之外交，素稱乖戾；故未爲德意志所愚弄。斯時俄羅斯與英國，使節往返，頗欲修好。英國對俄羅斯之解放運動，亦甚關懷。俄羅斯國會之解散，尤足引起鄰邦之同情；爲表示好感起見，英國與俄羅斯訂立協約，以解兩國在波斯之糾紛。波斯北部向爲俄羅斯商業所壟斷，今則劃爲俄之勢力範圍。其南部則爲英之勢力範圍。中部則兩國互享其利。獨波斯領土之完全，兩國允爲尊重。

焉。兩國並同意，彼此不干涉西藏。惟阿富汗則劃爲英國之勢力範圍。此時英俄親善，幾爲俄羅斯人民全體之意見；蓋若輩相信，聯合英法乃稱雄於巴爾幹及排除波蘭人與猶太人之門檻也。

俄奧交惡 當此之際，與俄羅斯不睦者，只與大利一國。奧經營巴爾幹，以伸張其勢力。然無往不與俄羅斯衝突。後以波斯尼亞 (Bosnia) 與黑塞哥維那 (Herzegovina) 二省之動亂，惹起俄土戰爭。以柏林會議之結果，奧大利遂得波黑二省之統治權。名義上雖仍屬土耳其，而實際上奧已駐兵參政。自是俄之勢力爲奧所奪，巴爾幹半島殆入奧之範圍。然又恐俄人議其後，故結德奧同盟以防之。厥後日俄戰爭，俄以甫經大創，瘡痍未復；唯注意戡定內亂，以蘇民生；對外之策，有所未遑。奧遂於一九〇八年，宣言正式合併波黑二省。南下之基礎遂定。然最爲阻梗者，則塞爾維亞。蓋二省中之居民本屬南斯拉夫種，而塞爾維亞又本欲聯合二省，及蒙特尼格羅國，以建一南斯拉夫大國者也。

巴爾幹戰爭 一九一二年十月，希臘與布加利亞，塞爾維亞及蒙特尼格羅四國聯盟，

進攻土耳其。聯盟軍隊屢戰屢勝，不數日塞爾維亞軍隊侵入馬其頓，阿爾巴尼亞北部，直抵亞德里亞海岸。十一月八日，希臘軍隊侵入薩羅尼加。布加利亞，道遠行遲，不得已進佔亞得里雅那堡城，追逐土耳其軍隊，以抵君士坦丁附近之地。土耳其敗後，乃與巴爾幹諸國締停戰之約，遣代表開和議於倫敦。割馬其頓與克里特（Crete）諸地以與同盟諸國。然巴爾幹諸國，互相猜忌；對於分配領土，意見頗深；而斯時羅馬尼亞又欲與布劃定新界，事遂更繁。布加利亞卒向希臘與塞爾維亞宣戰。布以四面受敵，力不能支，乃締約息兵，自是塞爾維亞輻員，視戰前幾增兩倍。奧大利經此戰後，亦受損失；故深不懌於現狀，而亟思破壞之。然塞人初不以此而自足，彼苦戰所得亞德里亞海岸一帶要地，經奧大利之阻撓，竟復讓出，而建設新國，曰阿爾巴尼亞者。俄羅斯向視巴爾幹斯拉夫族諸國，如長兄之撫弱弟，其不甘坐視奧大利之阻撓塞爾維亞，理所當然。惟國內工黨時常鼓噪，內憂正多，雖欲置喙，徒喚奈何！

各國積極備戰。當一九一三年時，各國莫不厲兵秣馬，躍躍欲試。德國國會議決增加非常軍費一千兆馬克。法國聞之，殊感不安，將國民從軍現役年限，自三年改爲二年。俄羅斯

自日俄戰爭失敗後，本積極改良軍隊；當奧大利合併波、黑二省時，俄以設備未竣，竟屈於德帝之一紙調和。由是國民益憤，與政府以擴張軍隊之良機。一九一三年七月，逐列國之後，亦通過新陸軍預算案，縮短現役年限。當此之時，箭在弦，刀出鞘，列強大戰，固意中事也。

歐戰之導火線 一九一四年六月杪，奧大利政府舉行陸軍演習，於波、黑二省境內。皇

儲斐迪南 (Francis Ferdinand) 大公與其妻，親往檢閱。歸時息於波斯尼亞首府，薩拉業服 (Sarajevo)。途遇兇徒，被刺而死。歐洲時局乃急轉直下。戰雲密布。奧大利以爲塞爾維亞之當局，實有暗助此種陰謀之嫌疑；故須負此次暗殺之責任。雖奧大利所遣調查員之報告謂無實證可以加罪於塞爾維亞政府，而奧國政府仍竭力誅求，務使此事變爲戰爭之導線。七月二十三日，奧大利致最後通牒與塞爾維亞，限於四十八小時內答覆。塞爾維亞之答覆，實際上已不啻完全屈服。時英國外交大臣格雷 (Edward Grey) 亦極力斡旋，謀召集一列強會議；而奧大利卒於七月二十八日對塞宣戰。

俄羅斯宣戰 先是奧塞宣戰前，奧大利即通牒各國，謝絕調停。然俄羅斯向以扶助友

國獨立爲名，焉能袖手而旁觀。況俄羅斯歷年求得海權之心甚盛，若塞爾維亞果爲屈服，必成奧屬。唇亡齒寒，巴爾幹諸國皆將不保，則俄人出海之望，豈非永決？昔年柏林會議，俄已屈從，積恨在胸，正所謂舊仇未復，新怨方興；若不乘機一呼，何以洗前此之貽羞乎？故毅然動員，積極備戰。德國以聯盟關係，遂於八月一日，助奧與俄宣戰。世界上之空前大禍，乃猝發矣。

第二節 俄羅斯參戰

俄羅斯內部之團結，當奧塞絕交之先，俄羅斯屢有革命事體發生。此爲數十年來，俄國心腹之患。七月四日同盟罷工，工人聚會，要求自由。與警士激戰於街巷之間，雖有死傷，未或稍緩。舉凡電信、鐵道，均被隔絕。政府雖加嚴禁，毫無效果。不數日間，蔓延至莫斯科各大都市，勢不可遏。然至奧塞絕交，羣衆動於大斯拉夫主義，粗暴行爲，不撲自滅。國民愛國，有如是者，誠可欽佩也。惟歷代俄羅斯政府概取壓抑政策，屬國如波蘭始終未肯心服，遇有機會，難免不叛。是以俄帝於戰爭起後，即許波蘭自治，以緩和之。波蘭人遂亦力戰。

俄軍侵入東普魯士 一九一四年八月，俄、奧、德既互相宣戰，俄遂分兵兩道：一入德國之東普魯士，一入奧國之加里西亞（Galicia）。其目的則在攻德軍之背，與英、法聯軍遙相呼應。時德軍注力於攻法。蓋法爲西歐重心，克法，不啻功成也。俄遂得機襲擊，以大隊人馬，勝德軍於哀賓能（Gumbinnen）附近地方。俄遂入東普魯士。德民逃竄，狼狽不堪。德帝憂之，遣大將奧登堡爲東方集團總司令。出兵於和恩斯田（Hohenstein）及坦能堡（Tannenberg）等地，開始攻擊。八月之杪，戰勢益烈。俄羅斯將領意見不合，未能互相援助，遂大敗。死傷無算。德軍既勝，復進攻阿來（Alle）河畔及馬薩林湖（Masurian），逐俄軍出東普魯士。所幸俄羅斯軍隊之入侵奧大利者，較爲順利；在加里西亞境內所向披靡。九月三日，攻克勒謨堡（Lemberg），更北援俄之中央軍，連破多城。二十一日，取惹羅斯蘭（Jaroslavl），與軍大窘。相與潰遁。於是加里西亞東中兩部，遂爲俄軍所佔有。是時俄軍五師，進逼普增密斯爾（Przemysl），屢攻未克，奧大利之危機因以脫過。然俄軍於加里西亞挫敗奧軍，牽制德軍之西進，以濟英、法之眉急，爲功甚偉。

波蘭方面之戰爭 其時西陸戰場，德軍失利，未達破法之願。東陸之奧又敗於俄，失加里西亞之大部。腹背受敵，德意志頗難應付。於是變其戰略，而攻波蘭。奈俄軍強勇，德軍攻略未遂。俄羅斯乘勢猛追。德奧同盟軍，因皆敗退。十一月上旬，俄軍再攻普增密斯爾城。對壘月餘，毫無進益。但在加里西亞之奧軍，却為俄軍戰勝，大敗而逃。

俄土戰爭 土耳其國勢，日以陵夷。北迫於俄，南制於奧。君士坦丁扼歐亞交通之門戶，而為強俄所覬覦。政治經濟，概仰外人之鼻息。歐戰釁起，極思有以振作；遂毅然加入同盟方面，與英、法、俄聯軍斷絕國交。惟壤地交接者，只俄羅斯一國。俄土向為世仇。故於十月下旬，便起始攻守。十一月上旬，俄軍主力漸次進抵埃爾斯倫 (Erzerum) 之東北。土軍守禦堅固，不能下。十二月下旬，薩里喀米斯 (Sari Kamish) 地方，發生較大戰爭，互有傷亡。俄軍先負後勝，卒將土軍追至土國本境，此後兩軍雖有戰爭，而無關重要；蓋兩國已無交戰之決心，其目的不過互相牽制以緩西陸之進攻而已。

一九一五年對德之戰況 一九一四年十一月中旬，俄軍重劃戰線：北自東普，東南至

羅馬尼亞國境，以對待德奧。與德會戰處共有二：一在東普魯士，一在波蘭。東普方面，戰線達百餘哩。德將興登堡從容指揮，於二月上旬敗俄軍，入俄境。俄軍狼狽潰遁，泰半皆降。德軍是時與登堡復遣兵駐瓦薩之南。一月下旬，德軍猛襲俄軍陣地，俄雖應戰亦力，而不克持久。至八月五日瓦薩遂陷。

俄羅斯之新作戰 俄軍之圍攻普增密斯爾也，迄無結果。至本年三月，城中糧絕。俄軍乘機猛攻。二十一日，遂克全城。同時俄軍與奧軍復交戰於匈牙利東部之布柯維納（Bukovina）俄未得利。另一軍則戰於喀爾巴阡（Carpathia）山脈以南地方。地勢險要，兩軍苦戰不休，相持月餘，爲俄所佔。德奧聯軍調軍來援，遂爲克復。德奧乘勝來救普增密斯爾，及勒讓堡，均爲恢復。八月下旬，奧軍再對俄軍開始攻擊。會塞爾維亞戰事迫急，俄軍往援，此方戰爭遂暫中止。俄皇尼古拉第二乘機下令親任海陸軍大元帥，以壯士氣，軍容乃振。

海戰概況 俄羅斯之海軍遜於德奧者多多。大戰之前，就驅逐艦一項而言，俄羅斯不過共有七十一艘，而德意志一國，則有一百四十九艘。其實力之懸殊也可知。一九一五年之

秋，波羅的海方面，俄德交鋒。惟以地勢關係，德艦運用弗靈，而俄軍只主防守，不事進攻，故無大戰。其次則爲里加灣方面之海戰。一九一四年至翌年三月，德艦隊先來攻四次。雙方劇戰。德艦隊負傷而退。八月十日，德國復水陸並進，攻里加灣。十八日破之，佔領要塞。然俄軍反攻時，德乃氣餒，旋即退出灣外。至黑海方面，俄土兩國亦曾發生戰爭。至一九一五年初春，俄人獲得黑海海權，與英法海軍攻擊達達尼爾海峽，以莫大之助力。

一九一六年之戰蹟 一九一六年三月下旬，俄羅斯陸軍在里加灣南方一帶，對德轉取攻勢。但前線德軍勢盛，遂未成功。六月上旬，俄軍於羅馬尼亞國邊境開始總攻擊，以促羅馬尼亞之奮起。是時，德與二國以俄軍久敗，不甚重視。未料八月中旬，俄軍竟深入德奧國境。其勢洶洶，同盟軍固無如之何也。

第三節 戰時之內政與三月革命

戰時之內政 當一九一四年戰爭初起之時，俄羅斯之專制政府，已暴露其腐敗無能。

俄帝尼古拉第二之昏瞶，一如其先之君主，迷信專制，壓抑人民，無所不用其極。惟自前線加里西亞戰敗後，國內輿論大譁，國會遂能藉以活動，聲勢漸長。固非政府所願，然至此已不能不虛與周旋。是時俄帝親征，宮府之中悉爲皇后及其嬖臣名拉斯普丁（Rasputin）者所把持。二人朋比爲奸，均竭力反對改革事業。其勢力彌漫於全國，雖俄帝之意志，亦須先經若輩之考慮，而後可以實行。處此污濁政府之下，貪官污吏在在皆是。萎靡不振之氣象，佐以儂卑鄙之風習，於是戰爭之設備，大受影響。其兵士之被遣入陣者，既乏礮火之掩護，更無適當之設備。兵隊調遣，類以貨車載運。北地嚴寒，兵士惟有戰慄而已。

國會攻擊政府 一九一六年冬，國務總理爲斯都默（Sturmer），乃一營私舞弊之小人，而甘爲拉斯普丁做傀儡者也。倒行逆施，怨聲載道。國會乃以單獨講和問題，及交通機關整理問題等，攻擊政府。斯都默見衆怒難犯，辭職引去。繼者爲特洛波夫（Troboff），素抱愛國主義，爲拉斯普丁之敵。然環境惡劣，反動派依然置喙；且前閣員中由拉斯普丁薦舉之內務大臣普洛托坡坡夫（Protopopoff），仍屹然不動，厲行其專制政策。特氏堅欲罷免普

職，而皇后一再向俄帝保舉。普洛托坡夫遂得蟬聯，而特氏毫無權力，悵然辭去。在職之期，不過一月有半耳。

權奸之死與政府之昏迷 一九一六年十二月三十日，拉斯普丁在彼得格勒之議會中，被刺而死。兇手爲皇后之姪婿，及國會中之一保守黨黨員。蓋皇后與其嬖臣之狼狽，雖皇族至親，亦皆恨之入骨也。帝國中之秩序，雖試謀恢復，然爲期已晚，無以爲力。加利進 (Galin) 維特洛波夫組閣後，遷延至一九一七年二月二十七日，始勉強召集國會。而政府仍謀壓服民衆，命各地方議會及各城市所組織之紅十字會聯合會停止工作。並添配警察，逮捕工人。彼得格勒一地，有三十萬工人對於政府舉行含抗議意味之同盟罷工。當此之際，各地倉廩空虛，民有飢色。雖通都大邑，亦莫不以食物缺乏見告。官僚復操縱指揮，藉以漁利。於是政府之信用，一落千丈。國會遂羣議補救之方。奈政府猶執迷不悟，不肯允許，反令停會。議員不服。革命之導火線，遂肇於斯矣。

三月革命之發端 三月初，情勢愈急。三日，彼得格勒宣布戒嚴。七日，紡織工人及其

他工人，突然發生同盟罷工。要求麵包之呼聲，遐邇咸聞。「和平」「停戰」之聲浪，亦甚囂塵上。各種工業，均行停頓。九日，工徒數千人遊行示威。高呼革命。軍警憲兵，干涉四散。同時國會之反對政府，愈加激烈。質難當局，並決議「國會與此貪污政府勢不兩立」。首相加利進謁帝於戰地。迫帝下詔，解散國會；然國會處之泰然，置若罔聞。

革命之經過 三月十一日爲星期日。彼得格勒之街衢，滿集市民。手執紅旗，唱革命歌。事前政府將戰場上之鐵甲汽車調回，用以鎮壓。至十一日，則由警察及哥薩克兵用機關槍等，向羣衆轟擊。一時老幼男女，紛紛逃散。屍血狼藉，滿目淒涼。次晨禁衛軍中著名之服林斯基 (Volymski) 聯隊，加入革命黨。其他隊伍，亦均取一致行動。築壘市巷，以備官軍。政府至是，遂無能爲力矣。

臨時委員會 其時一般社會主義者，將羣衆組成蘇維埃 (Soviet)——農，工，兵，代表會——革命組織，因以完備。京城各處，皆舉行大規模的遊行大會。雖俄帝最親信之禁衛軍，亦不願若輩被派來攻擊叛民之使命，而加入民主主義之軍隊。於是兵工廠被佔領，警察不

開事，各要塞多被襲取，而革命同志亦被釋放。警察總局之祕密文書，均被焚棄。下午三時，國會組織臨時委員會，任維持秩序之責。委員十二人，各黨均有代表。國會議長羅齊安科爲委員長。午後七時，召集蘇維埃第一次大會於議院。並發宣言，以後每工徒千人，可出一人於該會，共襄國事。傍晚，國會臨時委員會連接他處軍官之電報，表示服從該會，並願効勞。三月十一日，議長羅齊安科本嘗電請俄帝，更迭內閣；十二日復電達俄帝，促其覺悟，皆無回音。

臨時政府之成立 十四日市內稍呈平靜之象。憲兵警士雖仍多小鬪，居民商店，雖仍有懼心，而陸海軍大部投入革命軍。首相及前各大臣多已被拘。基礎漸固。國會臨時委員會乃組織臨時政府。擁李渥夫親王 (Prince Lvov) 爲主。聲譽卓著之社會革命黨黨員克倫斯基 (國會議員兼蘇維埃之副會長) 卽當日閉員之一也。

陸軍新令 三月十四日夜間，各大臣開會時，蘇維埃代表前往參謁。次日，蘇維埃表示擁護新政府。但須依普通、平等及直接無記名之選舉召集憲法建國議會。所有地方執政機關，均須以同樣普通方法重新選舉。軍人得參預內政。蘇維埃復要求政府，副署陸軍命令。

紙。此陸軍命令，乃足以殲滅軍官勢力者也。此令原限於京城之隊伍，然爲期未久，各地軍隊，均得傳誦，此新革命政府所發之命令。軍隊之精神及教練，自是遂渙散矣。

俄帝退位 臨時政府成立後，民皆歸心。俄帝尼古拉第二接電，急甚。然大勢已去，悔之

無及。國會決議罷黜俄帝。當尼古拉第二首途返查斯科西羅 (Tserikoe Solo) 宮時，路爲

之塞，不得過；轉向卜斯可夫 (Paskov) 市，知勢難挽回，於十五日遂下詔退位。讓帝業與乃

弟邁克爾 (Michael) 大公。未幾廢帝尼古拉第二及皇后並侍從等，皆被監禁，不得自由矣。

俄皇朝與世永決 蘇維埃及兵士咸不願皇室之復興。克倫斯基等向邁克爾大公詳

述斯旨。邁克爾本人亦宣稱苟無國民一致之表示，則不願繼承帝位。於是俄羅斯之君主政

體，與世遂告永訣矣。論者曰：俄羅斯君政之推翻，固不由於守在京都之國會，亦非由於遠處

瑞士之列寧 (Lenin) 及遠處加拿大之托洛斯基 (Trotsky)，亦非由於駐守彼得格勒之

同志；蓋皇室之衰敗，皆因政府自身之腐化無能，及皇后與其嬖臣拉斯普丁之貪污專橫，有

以致之也。

第七章 革命後之俄羅斯

第一節 臨時政府下之俄羅斯

三月革命之性質，俄羅斯歷史上之新紀元既已啓幕，則吾人宜研究其年來之革新進步。自臨時政府成立後，國內一時稍定。政府名義上雖以李渥夫爲首揆，而事實上則不啻外交大臣，立憲民主黨領袖，密利可夫之內閣。俄羅斯在專制皇帝鐵蹄之下備受政治經濟之壓迫，故此次革命尙含有經濟上之意義。而政府不察，只認爲人民想望民主主義及努力歐戰之表示。於是新政府之第一種行動，即爲一九一七年三月十八日新頒布之政治改革計畫。此計畫之要點，則爲釋放政治犯，言論自由，出版自由，結社自由，同盟罷工自由，廢除社會上宗教上及民族上之限制，普通選舉，與召集憲法議會。

新政府之新政策 三月二十日，臨時政府向列國聲明仍繼續以前主義，絕不單獨媾

和。至二十一日，通令赦免政治犯和宗教犯，並恢復芬蘭之憲法。未幾新政府取消限制猶太人之法律，並承認波蘭自治。政府廢除死刑，設戰時所得稅，沒收皇室和寺院之土地。至於分配土地於農民，及婦女參政權問題，則俟憲法議會決定之。

各黨之暗潮 其時政府勢力，約分三派：一為內閣；一為國會之執行委員會，羅齊安科領之；一為蘇維埃，克倫斯基領之。遇事牽掣，行政主張不能一致。關於戰局，則外交大臣密利可夫仍主張繼續戰爭，而克倫斯基則主張非戰。時前敵戰士及一般民衆，均感糧食缺乏。頻年戰爭，早生厭心。在野黨從而鼓吹，漸與蘇維埃取一致行動。民間要求『無割地，無賠款』之和約。與臨時政府為難。

布爾希維克派 當此之時，革命家列寧自瑞士歸抵彼得格勒。列氏要求即刻開媾和談判，並要求協約國陳述若輩戰爭之目的。（註）街衢遊行，層出不窮。俄羅斯人民自由言論，無所顧忌。牆壁滿貼標語。民氣頗盛。至五月三日四日，社會民主黨之一支，曰布爾希維克派（Bolshevists）者，組織反對政府之大遊行，打倒主戰之關員。然此種計畫，德意志政府實與

同謀。於是主戰最力之軍務大臣革奇可夫 (Guchkov) 因有增無已之抨擊，乃於五月十三日辭職。末幾密利可夫亦於媾和之聲浪中，繼之而去。十七日革命領袖托洛斯基由加拿大返俄。於是布派之勢力，益形濃厚。

新聯合政府 密利可夫及革奇可夫辭職後，蘇維埃對應否參加新聯合政府問題，頗起爭議。最後由克倫斯基主張，以社會黨各派加入內閣，以期與政府調和。遂由四十一票對十九票之大多數通過。新閣中之人物，雖爲非社會主義者佔大多數，——屬於立憲民主黨之閣員七人，屬於十月黨之閣員二人，——然內中之社會主義信徒，却有六人之多。足徵新黨努力之結果矣。惟是彼得格勒蘇維埃雖贊成新閣，而在托洛斯基指揮下之布爾希維克派則極力加以反對。

內部之紊亂 至此，勞働者假蘇維埃之組織，與政府及資本家對抗。要求減勞働時間，加勞働工資。又以紙幣價落，百物昂貴，工廠倒閉，金融停滯，經濟界大起恐慌。而各地農民復奪國有土地，人心渙散，秩序大亂。政府威權掃地已盡。至七月一日，民衆又舉行大規模之示

威運動。工廠中與兵營中之羣衆，結隊遊行，途爲之塞。民衆所持之旗幟及標語，多爲布派所製造。內有「打倒資本主義的政府」及「全權歸諸蘇維埃，保證憲法議會之安全」等。足徵此次運動之精神矣。翌日，政府召回前線兵卒，鎮平後方。克倫斯基仍倡對外一致，以統一國內之說。且親巡戰場，人心再振。

七月暴動 然軍隊中設備極不完全，供給皆不如法。而兵士復缺乏精神，遂爲德奧軍隊戰敗。布爾希維克派更得乘機活動。立憲民主黨諸閣員，不得已，相率辭職。七月十七日民間舉行一種革命之遊行運動。羣衆圍繞中央行政委員會所駐之辦公室，要求逮捕閣員傑洛夫 (Oherov) 及截列特利 (Tsereteli) —— 皆社會主義者 —— 並著散中央行政委員會。當局調兵鎮壓，互起衝突。暴動遂平，而騷亂中所殺死之士女，則逾五百人焉。

克氏內閣 七月二十日，國務總理李渥夫辭職。克倫斯基繼之組閣。閱二日，蘇維埃行政委員會議決將最高國權付與克倫斯基內閣，致使布爾希維克派羣起反對。克氏便起始壓迫布爾希維克派之報紙。雷厲風馳，托洛斯基等激烈份子，悉被拘禁。若輩之罪名，則爲受

德國蠱惑，促止戰爭；而造成七月之暴動。列寧幸先避走，未爲所捕。然前敵軍隊，仍愈趨愈劣。八月三日，克倫斯基復因與閣員意見不和，辭職擬去俄都。乃臨時政府以及各政黨領袖，咸主挽留，以鞏固政府。克氏遂留任，組織新閣。

莫斯科會議 累年兵燹，民不聊生。新閣成後，皆大歡忭。惟列寧領率之布爾希維克派，仍本其革命精神，始終奮鬥。克倫斯基遂於八月二十六日在莫斯科召集全國非常會議。蘇埃協作社，市區，工聯，國會，和各省區等代表，蒞會者達一千四百餘人。布爾希維克派力言此次會議之主要目的，不外鞏固一種完全保守的組織，以解散蘇維埃。更依此堅實之立足地，而反對布爾希維克派。故此次會議，不獨不能聯絡各種勢力，以和衷共濟；反足使各種勢力，愈趨分裂。

科尼樂夫叛亂 科尼樂夫 (Kornilov) 將軍者，曾出席於莫斯科會議。報告軍隊及軍律廢弛狀況，並陳述改造整頓之方法。未及採用，而德軍即從海陸兩面，猛烈攻破里加 (Riga) 地方。大有進迫都城之勢。克倫斯基乃電科尼樂夫將軍，促其援助。將軍不聽。自稱

總司令。欲奪政府實權。克倫斯基免其職；遂叛，率兵襲京都。未成被獲。克倫斯基遂爲陸軍總司令。

全俄民主會議

科尼樂夫失敗後，中產階級及立憲民主黨之勢力，大受打擊。蘇維埃勢益增加。布爾希維克派乘機攻擊政府。蘇維埃漸受其影響。竟能支配選舉票中三分之一。遂大倡共和制度採用之論。並要求召集第二次全俄蘇維埃大會。溫和派反對。執行委員會乃用妥協方法。於九月二十七日召集全俄民主會議。新聯合政府因運而生。閣員之屬於立憲民主黨者八人；屬於社會民主黨者五人；無黨籍者二人。布爾希維克派則未與焉。

臨時國會

內閣既成立，克倫斯基仍充內閣總理兼總司令。與憲法會議召集之前，先開臨時國會。此一九一七年十月八日事也。會中約有三百四十四人爲勞動階級代表；有一百五十三人爲中產階級代表；布爾希維克派前曾選出五十三名代表。至對於此次臨時國會，彼輩則認爲政府與資本階級自由主義者提攜之表示，故相率退席。

第二節 第二次大革命

一九一七年冬之經濟狀況 俄羅斯領土遠跨歐亞；面積之大，農林之富，鑛山之饒，世所罕匹。然自革命以來，連年轉戰，內政不寧；舉凡產業，全歸荒落。國內紙幣充塞，物價增高，生活必需品之供給減少；私人將土地與產業售押於外國銀行。奸商投機買空賣空。聯合政府與蘇維埃均不能禁止之。國家養兵竟達一千五百萬人之多。因之民窮財盡，流為盜匪乞丐。考莫斯科一地，物價之高，一九一七年較一九一四年所增不啻二倍。工人工資之增高，則較物價增高為益速。處此工資暴增，百物昂貴之際，政府猶能支持者，乃恃濫發不換紙幣之一法耳。金融因之始而紛亂，繼則影響各業。全國擾攘，不可名狀矣。

國債之繁重 非特此也，是年十月俄國國債，共達七百億盧布。其中長期內債，約一百五十七億盧布；長期外債，約二百五十億盧布。（內法國最多，佔一百五十五億盧布；英國及其他國則佔一百餘億盧布。）短期借款與紙幣公債，約二百八十餘億盧布。俄羅斯經濟之

恐慌，可見一斑。卽就國債之利息與還債金而言，年須四十五億盧布。較一九一六年全年之歲入，有過無不及也。

布派勢力之膨漲 三月革命及科尼樂夫叛亂之後，布爾希維克派之勢力，日見增加。此時各黨派逐漸開始分爲：布爾希維克派及反對布爾希維克派。社會革命黨及社會民主黨之一支緬希維克派 (Mensheviks)，均贊成繼續參戰，擁護臨時政府；頗思將經濟組織中之根本改革，留與國會解決。至此蒸蒸日上之急進的布爾希維克派則主張：(一) 反對臨時政府，(二) 一切權力給與蘇維埃，(三) 沒收土地及實業，(四) 反對帝國主義的戰爭，(五) 設置武裝民團。此時俄國政黨中之能號召民衆者，却惟布爾希維克一派而已。

全俄大會之召集 布爾希維克派既得多數民衆之援助，於是要求召集第二次全俄蘇維埃大會一事，不復延遲。蘇維埃中央執行委員不得已，定期十一月七日召集會議於彼得格勒。事先布派領袖固嘗開會討論進取問題。列寧極力主張要統治已瀕於無政府狀態之革命武力，須奪取政權，然後卽可命令調動軍隊應戰。先將土地歸還農民，後將主要產業

使其社會化。俄國土地廣漠，氣候酷寒，各國於酣戰之際，必不能妨礙蘇維埃革命也。故此大俄大會之召集，正布派預備奪取政權之機會耳。

蘇維埃日 布派定十一月四日爲『彼得格勒蘇維埃日』。是日，大隊男女，遊行示威。其標語則爲『打倒克倫斯基政府』、『停止戰爭』、『一切權力歸於蘇維埃』。向爲克倫斯基所信賴之軍隊，全體議決贊助布爾希維克派。暴徒復佔領彼得及保羅砲台。翌日，軍事革命委員會任命許多委員，掌管車站，并負責維持電信、交通。赤衛軍及水兵佔領電報局，和其他機關，并預備奪取國家銀行。同時中央執行委員會及軍事革命委員會總部斯莫爾尼學院 (Smolny Institute) 變成砲台。

首領革命 十一月六日，克倫斯基要求臨時國會，贊成對於布爾希維克派採用壓制手段。當晚政府從彼得霍夫 (Peterhof) 士官學校召集砲兵隊，并集立憲民主黨及一般職官於冬宮。布爾希維克派則防守通達首都之一切道路，并派員各處宣傳。遇政府軍隊，則勸導服從。一夜之間，布派遂佔有都城多數重要機關。

臨時政府之顛覆 臨時政府所在地——冬宮——於七日漸次被圍。下午一鐘，革命領袖托洛斯基在彼得格勒蘇維埃會中宣言，臨時政府即將推翻。在全俄大會議決正式辦法之前，一切權力均由軍事革命委員會負責。當晚第二次全俄蘇維埃大會的預備會，正式開會。一般勇士以中央執行委員會名義，進逼冬宮；而向冬宮轟射大礮。各總長悉被捕。克倫斯基微服出奔。僅以身免。於是臨時政府完全消滅。大權悉歸於軍事革命委員會。臨時國會，隨亦解散。

全俄大會之特色 然猶有一事值吾輩之注意者，即第二次全俄蘇維埃大會之特色是也。開會之日，布爾希維克派所佔議席最衆。足有百分之五十。其次則爲農民團體，社會革命黨左派佔多數。與會代表皆爲年富力強之青年。水兵代表來自波羅的艦隊；兵士代表來自前線；工人農夫不在少數；間有文雅學子，皆爲左派分子。半老農夫，或老年之社會黨領袖，皆被屏去也。會中列席代表多來自北方及中部幾省。此數處以窮苦半無產階級之農民爲最多。且熟練之工人，管理城市，飢荒之逃兵，治理鄉村。至土地肥沃之東南各省，與西伯利亞

一帶，出席之代表，比較實佔少數。故第二次全俄大會特別表示北方及中部各省工人與農人革命精神；他處人民之感覺饑饉與厭惡戰爭者，自易表同情而起響應也。

第三節 共產黨專政

新俄之新政 自臨時政府傾覆以後，一切權力即刻轉入軍事革命委員會手中。此新興勢力之第一命令，為廢除死刑，與公布軍事委員會之重行選舉。新蘇維埃會長托洛斯基通電全國，報告革命經過情形。列寧復宣布此後應取方針三項：（一）前線立刻停戰，結束軍事，作為構結和約之一種先聲；（二）使農村土地委員會暫管地主財產，然後分配於農民；（三）工人管理工廠，並講求現在國內經濟危難之救濟法。

人民代表委員會 布爾希維克派乘機實行無產階級專政。選出人民代表委員會，以組織勞動者及農民之政府。此會完全為共產黨——（布爾希維克派自後便改稱此名）之黨員所組成。革命最有功之列寧被舉為委員長。托洛斯基被舉為外交總長。新政府雖已

成立而反動派及緩和革命派，頗事攻擊。一般智識階級之人民，起初皆不肯與此種制度通力合作。技術工人，書記，電報生，打字人，及其他人等，以怠工方法對付政府。中央與各省間之交通，因之而斷絕者，爲期甚久。

社會恢復原狀 其時新政府發表工人管理工廠之命令，無異一紙空文，不生效力。實際上工廠中之工程師，受有產階級賄賂，相率罷工。工人遂亦停工，更以管理食物分配機關，不能供給工人溫飽，故工廠并無工人實地管理。迨人民委員會提出銀行國有，與取消外債二案，經蘇維埃中央執行委員會通過後，私人銀行悉被赤衛軍佔領。款項不得攜出。因此罷工者失其接濟。智識階級無援可恃，乃復職上工。他如銀行，工廠，均復原狀；政府遂獲全勝。

鎮平舊勢力 同時緬希維克派及社會革命黨出席第二次全俄大會之議員，與依地方區域選舉之蘇維埃議員聯絡，一致組織委員會，定名曰保護國家與自由委員會。以斯莫爾尼學院爲會所之布派蘇維埃，起而與爭。蓋一以地方區域選成之蘇維埃爲工具，一以產業工人蘇維埃爲工具；二者皆欲一決雌雄而奪取政權也。十一月十一日，開始巷戰。結果，反

對派悉被解除武裝。反抗分子或被捕禁或被放逐。反宣傳出版物統被摧毀。翌日，克倫斯基親自率哥薩克軍隊進攻彼得格勒，相傳兵力雄厚，數逾二萬。先佔查士科塞羅地方之電報台。克倫斯基與保護國家與自由委員會本有聯絡，預定裏應外合之計，無奈內部發動太早，致遭失敗。今既兵臨城下，工廠工人所編成之赤衛軍，遂與力戰。卒迫哥薩克軍敗退潰散。然彼得格勒工人所以能戰勝軍隊而奏凱旋者，概因布派士卒多於敵人，更加精神團結，不若對方之散漫故也。

憲法會議 勞農政府於京都內外武力抵抗事鎮平後，遂轉而注意於憲法議會。十一月二十五日，全俄開始選舉此議會議員。而選舉結果，社會革命黨員實居多數。布派不及三分之一。開會期爲一九一八年一月十八日。會中布派提議推舉革命女英雄瑪麗 (Marie Spitzkova) 爲議長。未成，終選社會革命黨領袖傑洛夫充任。

平民權利宣言 全俄蘇維埃中央執行委員會委員長斯浮德洛夫 (Sverdloff) 隨即宣讀「作」的與被侵掠的平民權利宣言」 (Declaration of the Rights of the



Toiling and Exploited People) 并且要求議會予以通過。此種宣言隱示一切權力歸於蘇維埃。憲法議會以是始終不與通過。一月十九日投票取決時，竟被否決。布爾希維克派無可奈何，遂以憲法議會為有產階級之反對革命黨，於二十日遣水兵司令前往解散。於是俄羅斯之憲法議會，曇花一現，乃壽終矣。

國是大會 未幾，復有國是大會 (Great Convention) 之召集。參加者多各省工、兵、農、蘇維埃代表，及承認蘇維埃為俄國最高機關之憲法會議員。一月二十三日正式開會。閱三日，遂將『工作的與被侵略的平民權利宣言』通過。并作為蘇維埃共和國憲法之基礎。宣言共分四款。首訂俄羅斯為一工、兵、農、蘇維埃共和國。俄國之行政，盡屬於蘇維埃；并謂蘇維埃共和國乃自由民族之結合，自由民族共和國之聯邦。宣言復稱土地為全國人民之財產，根據平等原則，交給做工人使用。國內生產，分配，運輸等機關，及田地，均歸國有。取消俄皇政府之外債，廢除密約，進行議和。宣稱亞洲民族自決，并承認芬蘭、波斯、及亞爾美尼亞 (Armenia) 獨立。總之，此宣言之精神，在反對封建制度，且主張以經濟平等為基礎，而實

施政治上之自由。自以爲乃二十世紀之新產物，開歷史上之新紀元也。

俄德和約 於時國內土崩瓦解之勢，岌岌不可終日。而東歐戰場之俄軍，已無力與德奧軍隊抵抗。布爾希維克派固夙昔反對克倫斯基繼續戰爭者，乃提出俄德單獨媾和之議。一九一七年冬，由俄德奧土四國遣派代表，在俄之布勒斯特里多佛斯克 (Brzez Litovsk) 地方，開始媾和談判。會議多時，不能解決。至一九一八年春，始談判妥洽。遂於三月三日簽訂俄德和約。俄國隱忍屈伏。凡土耳其領土之被俄佔領者，須即退出；而俄國領土之被德奧軍隊佔領者，則大都不復爲俄有矣。俄羅斯放棄芬蘭，波蘭，立陶宛，愛沙尼亞，烏克蘭等地。任其獨立後，計損失領土七十八萬方啓羅密達；喪失人口，達全俄人口三分之一；并損失實業機關三分之一；煤鐵出產四分之一。今日俄羅斯在歐洲所餘之領土，幾與彼得大帝以前情形相髣髴，不比往昔俄羅斯之豪大而豐裕矣。自是俄都彼得格勒已失其政治上及軍事上之重心，故政府遂遷都於莫斯科焉。

第八章 建設中之蘇俄

第一節 革命政府之設施

新俄憲法 新俄羅斯（俄羅斯社會主義聯盟蘇維埃共和國）（Russian Socialis Federal Soviet Republic）之憲法，成於一九一八年七月十日，乃經第五次全俄蘇維埃大會所通過者。其旨在規定蘇維埃掌握大權，并化國內之土地、天然產物、銀行及工廠等為社會所有。其性質則為無產階級專政——（Dictatorship of Proletariat）。國內之最高主權操之於全俄蘇維埃大會。由城市蘇維埃代表（二萬五千選民舉一代表）與地方蘇維埃會議代表（十二萬五千居民舉一代表）組織之。由此大會產生一不滿二百人之中央執行委員會。於大會停會期間，中央執行委員會負指揮全國政務，并議決人民委員會之人選與進行計畫之責。凡以勞力而做生產工作者，或任海陸軍兵士者，無論男女，若其年齡

滿十八歲時，均得享有投票權，及被選爲蘇維埃代表之權。宗教民族及居留期限，則無涉也。

反動勢力 自一九一七年十一月革命之後，蘇維埃政府恆受各方面反對派勢力之攻擊。別其主因，可分爲三：（一）舊俄皇室之黨羽，希圖復辟；（二）協約國及捷克斯拉夫
人反對蘇維埃政治，遂挑撥俄國舊人物去作反抗運動；即世人所稱之白黨者是；（三）左
派社會革命黨與無政府黨反對蘇俄所訂之德和約，組織俱樂部。赤衛軍圍襲射擊，無政
府黨員死傷極多；餘悉被捕。及後，左派社會革命黨亦被封禁；故聯合反抗當局，以復政治上
之勢力。

反動派之活動 一九一八年八月，有被解散之憲法會議員，集於薩馬拉（Samara），
力圖組織新政府。立憲民主黨黨員亦組織『俄羅斯復活同盟會』。皆思恢復其早年之地位。
但均未成功。十月間，反布爾希維克派諸政黨，更組織一全國會議，集會於東俄烏發（Ufa）。
選『執政』五人，負責理事。同時有農民運動，及革命運動首領，名蔡科夫斯基（Chalikovsky）
者，組織北伐政府。主張恢復地方自治，并主張普通選舉，向德宣戰，及廢除德和約。

謝米諾夫 (Semenov) 將軍，與駐紮滿洲之赫威 (Horvat) 將軍等，建設新政府於貝加爾湖之東部西伯利亞。黑海艦隊司令柯爾加克 (Kolehak) 亦與焉。昔日曾爲俘虜之捷克斯拉夫兵五萬餘名，組織成軍，預備進攻。日本及協約國軍隊，亦相與在海參威 (Vladivostok) 登岸。七月十六日，蘇俄政府以發覺廢帝尼古拉第二有復辟之陰謀，於業卡忒麟堡 (Eckaterinburg) 處帝死刑。事前，捷克斯拉夫兵雖欲援救，然爲期已遲，固難爲力也。至十一月二十日台尼金 (Denikin) 將軍所統率之哥薩克軍隊，驅散烏克蘭國會。於南部俄羅斯又組織一反對布爾希維克派之政府。

革命領袖之雄略 此種反動，皆未成功。其失敗緣因，則各處相同。蓋反動勢力之增加，雖足使此蘇俄政府受莫大之刺激，而實則使其團結益堅，固無損也。吾輩於此不得不佩服革命領袖之才幹與毅力焉。夫列寧率少數黨徒，置身於革命事業，百折不回，卒達目的。且執政者多爲曾受美國共和制度所薰染之猶太人。彼輩在昔日俄皇壓制之下，皆不得展其長才者也。如托洛斯基創始赤衛軍，蕩平反革命派，統一全俄，厥功甚偉。俄國歲入，大半移作宣

傳費用；既能消滅反對思想，又能激動協約國之民衆。然共產黨之手段，則惟製造『恐怖』以威嚇其敵方。當時官吏之被殺者，爲數甚夥。反對派亦採此法。一九一八年八月三十日，警察總監烏立斯基（Ulyshy）遭暗殺。未幾，社會革命黨員都拉加坡蘭女士（Dora Kaplan）謀刺列寧。未成，黨羽悉被捕禁。故此後各工廠、軍隊及學校等處，咸設秘密偵探；蓋防反對派之再起也。

反動派失敗原因 自反對派方面觀之，其失敗緣因，首在內部不和。其將帥人物，自柯爾加克以次，均不爲全部所信賴。與新黨之全部抱有熾烈之勇氣者，相差甚遠。且黨派紛歧，內部常缺一致之精神，易被攻破。猶有進者，協約國會令舊黨與新獨立各國——如波蘭、芬蘭、愛沙尼亞等——聯絡，共擊蘇俄政府。荷舊黨許諸國以俄國恢復而後，承認其獨立條件，則不難攜手共助蘇俄政府。乃計不出此，仍守其陳腐頭腦，封建思想，固執所謂國權之論。諸國失望，盡行解體；協約國之計畫，卒歸泡影。諸國遂舍舊而近新，此又反對派政治上失敗之原因也。是以一九一九年十月，于登尼其（Yudenich）將軍，雖直迫彼得格勒之近郊；一九

二〇年十一月蘭吉爾 (Wrangel) 大將，雖率重兵北伐，威勢澎漲；而終爲托洛斯基之軍隊所征服也。

蘇俄經濟之困難 當此之時，俄羅斯之經濟現象，已萬分恐慌；蓋自政府採用共產制度以來，土地雖分給農民使用，而政府徵收其生活上必需以外之剩餘穀物。一切生產機關，皆爲國有，國營。國民對於工農生活上必需品之分配，皆有一定。藝精而勤者，以爲吾雖勞苦，所得不過如是；彼藝疎而惰者，亦以爲吾雖偷閒，所得亦不爲寡。因是羣趨於怠業，而無振奮之精神。加以歐戰及革命之紛亂，工農出產，遂爲銳減。人心動搖，危機四伏。一九二〇年十月十五日，農民代表三千餘人，要求政府明確限定農民之義務，并改良農民政策。一九二一年三月，克朗斯泰 (Kronstadt) 水兵，忽起革命；其最大原因，卽係農民對於徵收穀物之不滿，及要求貿易之自由。民間之怨聲，由此可見一斑。加以連年饑饉，餓殍遍野。窩瓦河 (Volga) 流域及東南烏克蘭盡成邱墟。蘇俄政府岌岌可危，乃毅然於一九二一年七月採用新經濟政策矣。

新經濟政策 一九二一年三月十五日，全俄蘇維埃第十次大會中，列寧曾發表宣言，

謂：『吾輩不宜妄評社會主義，即是福星，資本主義即是禍水；須知在此種小生產之下，若不能利用大產業，則資本主義之發展，仍難幸免。……今日之急務，爲擴張生產；而實際上，全國民衆之怠惰，貧窮，工作缺乏，種種困難，達於極端。故吾輩不得不犧牲一切，而求生產之增進，以應民間之需要也。……』觀此，可知政府改行新經濟政策之決心矣。其制唯何？曰：（一）准許私人經營小企業；（二）國有之企業，工廠，森林，土地，等得租給私人經營；（三）推銷國貨招商承賣；（四）協同合作，即聯合資本主義團體，以適於經濟目的，并勵行利權政策，誘致外國資本，以開發資源，振興實業。故新經濟政策者，容許財產私有之『國家資本主義』也。

新經濟政策之果 自新經濟政策實施以來，俄羅斯之產業，蒸蒸日上，即國營之企業，亦日益進步。此亦見列寧之善變。惟此後之新時期，則不免矛盾之現象；蓋共產黨乞求資本家之投資，以濟俄羅斯之眉急；俾日後亦得爲共產黨活動之標的。自他方面觀之，資本家及

各國政府，亦願利用此項機會，以發展實業；且望投資後，能改造其共產主義。新經濟政策施行後，發生一新中產階級，與法蘭西一七九五年時之商人，初無所異。故共產黨員每以此而生畏懼，政治首領亦因之而起衝突焉。

蘇俄之法制 司法方面，蘇俄亦有新異之建設。一九一七年十一月革命期間，本設有革命裁判所，以審判臨時之特別事件。迨內亂平息，國基奠定後，政府遂漸注意法制問題。然其憲法明訂廢止土地之個人所有權，且一切土地農村經濟企業均屬國家所有，聽國家之支配，故私產制度，完全取消。人民訂立契約之能力，亦與俱逝。於是人民間之糾紛，只由民衆審判官根據無產階級之意識，及其產主義之權利觀念，分別加以裁判。初無所謂民法或刑法也。但自新經濟政策實施後，於一定範圍之內，承認私人企業。其間關係繁雜，不能再任法官之意思爲轉移。遂於一九二二年，草訂新民法四百五十三條，外補充條例五條，由全俄蘇維埃中央執行委員會公布，翌年一月實行。他如勞動法，刑法，商法，法院編制法，亦均先後頒布而施行焉。

新教育設施 蘇俄之一切設施，雖或爲世界各國所批評；然其教育制度與教育設施之改良，則鮮有人持異論者。俄皇時代，教育事業，概爲政府、教會、地方自治團體，及私人經營。至蘇維埃政府，則將一切教育事業——除美術、簿記、速記學校外——統歸政府掌管，禁止私人經營。其教育主旨，在養成共產主義之信徒，且爲能勞動而從事生產者。政府努力於普及初級教育。凡少年之年齡適合者，皆得免費入學。故一九二一年，初級小學竟達八萬三千處；就學兒童六百八十萬人。較歐戰前，學校增加百分之三十，學生增加百分之七十；可謂盛矣。惟因財政困難，師資缺乏，一九二二年後，遂日就衰落。至此，政府不得不一變昔日之多量政策，而爲務實政策。理論空說減少，注重工程實學；且選派留學生赴國外研究科學焉。

宗教之改革 俄羅斯人民受宗教思想之薰染貫注，已數百年矣。其信仰之篤，爲他國所不及。且政教不分，互相利用。俄人教育幼稚，思想單簡；雖種深毒，猶不自知。臨時政府時代，曾召集宗教會議，恢復『總主教』以實行政教分治。及第二次革命後，憲法明訂教會與政治分離，學校與教會分離，并沒收寺院財產。根深蒂固之教會，至是遂受莫大之打擊。俄羅斯

之教會，慣於偽造聖蹟；以蠟製之軀殼，冒充聖徒之遺體。藉愚良民，而斂資財。今則被黨衆揭破內幕，發起反宗教運動，牧師僧正之被戮者，實繁有徒。會俄國有所謂精神基督教者，以精神的信仰爲指歸；提倡宗教之改革，反對舊教之詐僞。且有請求中央執行會允許於教會中，設置共產黨祕密機關者，將來精神宗教之日盛於俄羅斯，固意中事也。

第二節 蘇聯與世界

蘇俄之鄰那 俄羅斯境內，民族繁多。其政俗，語言，亦各有異。於一九一七年十一月革命後，紛紛獨立，建設新國。計西境有芬蘭，波蘭，愛沙尼亞，立陶宛，拉脫維亞，白俄羅斯；西南有烏克蘭；高加索方面有喬治亞（Georgia），阿美尼亞，阿才培疆（Azerbaijan），中亞細亞方面，有布哈拉（Balkha），基發（Khiva），西伯利亞方面，有遠東共和國等。諸國各自爲政，皆不相涉。波蘭始終爲共和國。一九二〇年與蘇俄曾有劇烈戰爭。波蘭勝；訂和約於利加。然與蘇俄仍立於反對地位也。烏克蘭，喬治亞等先爲共和國，旋改建蘇維埃政府。布哈拉，

基發則只採用蘇維埃式政府，而不奉行社會主義。他如立陶宛、愛沙尼亞等，則先建蘇維埃政府，而後改爲共和國者也。

結好友邦

蘇俄自歐戰以後，重以內亂，財政異常支絀，領域瓦解，經濟更難發展；兼以連年外患，而國際貿易又不能不辦；欲達此目的，舍聯絡各共和國一致對外，別無良策。故對於同屬蘇維埃政體之各共和國，極力拉攏。先後締結同盟條約者，有白俄羅斯、烏克蘭（皆一九二〇年），及後高加索各共和國——喬治亞、阿美尼亞、阿才培疆（一九二一年）。蘇俄政府兼掌各該共和國之軍事、財政、交通、郵電，及國際貿易等事。蓋各該國歲入頗少，財政上有不得不從此向以盟主自居之蘇維埃俄羅斯也。

蘇聯之組成

一九二二年三月，喬治亞、阿美尼亞，及阿才培疆互訂條約，組織後高加索（Transcaucasian）社會主義聯邦蘇維埃共和國。同年冬季，日本在沿海省撤兵，停止侵略；遠東共和國遂與蘇俄合併。舊日疆域恢復泰半。社會主義大聯合之議，甚囂塵上。至十二月二十五日，全俄第十屆蘇維埃大會開會時，通過另訂聯盟條約，建設大聯盟國家之議。

案。事前各邦均已接洽妥當，故十二月三十日，即召集第一次蘇維埃聯盟大會，通過聯盟成立之宣言，及聯盟條約草案；并選舉代表，組織第一次聯邦中央執行委員會，負草訂憲法之責。至一九二四年一月三十日，開第二次蘇維埃聯盟大會，批准憲法。蘇維埃社會主義共和國聯盟，遂正式誕生矣。

聯盟蘇維埃大會 此種聯盟，純爲各邦之自由結合；蓋一九二四年七月七日在莫斯科公布之聯盟憲法中，有各共和國得自由退出聯盟，且得變更其各該國領域之規定也。聯盟之統治機關，甚爲單簡。約分六級：下自各村，各鄉，各縣，各省市，各聯盟共和國，以至聯盟中央政府，皆僅設蘇維埃大會，及執行委員會二種機關。聯盟蘇維埃大會，由省蘇維埃大會及市蘇維埃大會代表，共二千一百二十四人，組織之。其中有議決權之議員，一千五百四十人；無議決權之咨詢委員，五百八十四人。有議決權議員之支配方法，則蘇俄佔百分之七十七，而烏克蘭只佔百分之十六，白俄羅斯只佔百分之二，後高加索只佔百分之五而已。此會每年開會一次。閉會時，由聯盟中央執行委員會代行其權。委員會每年開會三次。閉會期間則

由聯盟中央執行委員會幹部會，總攬其權；故中央幹部會者，聯盟之立法，行政，及管理之樞紐也。

列寧逝世 列寧氏，集俄羅斯革命運動之大成，推翻封建政府，提倡世界革命。聯合弱小民族，誓與資本主義決鬥。進行以來，頗有成績。其內政，亦井井有條，日趨富強。採用新經濟政策，修好友邦，皆其老謀。惟此革命領袖，以多年策畫，頗費精神，日久積勞，遂成痿疾。一九二四年一月二十一日逝世。時年五十有四。俄人哀痛異常，如喪考妣。羣議以彼得格勒改名爲列寧格勒 (Leningrad)，用當紀念。

蘇俄之外交 夫蘇維埃俄羅斯自成立以來，其外交策略果如何乎？蘇俄樹立之目標，本爲內謀共產制度之實行，外圖世界革命之完成者也。奈反革命之禍亂甫平，而經濟之恐慌又起；勢不能不先謀自給，以固國家之基本。政府遂鼓勵資本與物品之輸入，并謀列強之承認與親善，以恢復其舊日之地位。計自一九二〇年迄今，先後恢復邦交者，達二十餘國焉。然俄羅斯本以尋求不凍海口爲歷來之外交政策者。乃西挫於英，東敗於日，皆不得逞其志。

歐戰起時，首先奮其利爪，思略巴爾幹，再出地中海。乃大革命起，卒未成功。歐人多額手相慶，以爲一時可無憂慮；豈料新俄利用其主義，宣傳之新武器，既不放棄昔日南下之政策，反進行愈厲。如土耳其，如波斯，如阿富汗，先後俱折入其勢力。蓋其政策不復如俄皇時代作露骨之侵略，而在標榜民族之解放運動；足以喚起世人同情，而協拒資本制下之帝國主義也。

各國之反俄防線 首當其衝者，爲帝國主義色彩最深之英國。歐戰時，英國以俄國與德國單獨媾和，憤其背約；遂不惜聯絡法國，實行武力干涉。其後英法國內經濟困難，且干涉無效，只得改絃更張，於俄境各邦造成反俄防線，以爲思想及經濟之封鎖。但未幾，各國復與俄羅斯修好。此一九一九年至一九二四年事也。迨至共產黨宣傳日烈，資本主義各國，莫不受其影響；而英國尤感不安。於是又有第三次對俄防線之建設。波羅的海四國——芬蘭，愛沙尼亞，立陶宛，與拉脫維亞（Latvia）——及波蘭等國皆與焉。惟當時西歐資本主義各國，以大戰結果，財政困難，且分贓未均，互相傾軋，不肯稍讓。共產主義之宣傳，世界革命之企圖，自可乘隙而入；英國有鑑於此，遂百計聯絡，以鞏防線。洛加諾（Locarno）會議（一九二五

年英、德、法、比、波蘭六國）即其例也。

國際新局面 德意志自俄德和約以來，與俄修好，且爲首先承認蘇俄之國家。於洛加諾會議後，加入國際聯盟。頗欲離俄，而與西部諸國親善。俄以爲慮。至一九二五年十月，俄德雖締結通商條約，而德則虛與週旋，實則日與西歐諸國接近，置俄於不顧。俄憤甚，遂利用法國與波蘭，以控制德國。法、德固水火不相容者，而波蘭則因洛加諾協約無保障萊茵方面之領土，亦不滿於德者。故俄遂與之協定，且陰促法俄之親善焉。意大利爲法西斯主義發源地，與俄羅斯共產主義針鋒相對，絕不稍容。惟以并非比鄰，故直接無甚衝突。果有戰爭，意之助英，固意中事。美國爲英國之債主，自不願英國之淪亡；故一旦英俄有事，無論俄法與俄德關係如何，英必聯合美意，以抗俄也。

西歐宣傳之失敗 蘇俄之擔任西歐列強方面之共產宣傳運動者，爲第三國際主席，齊諾維夫（Zinoviev）。然其結果，多以失敗聞。匈牙利之革命，三日而止；運動最力之德國亦無成效，且至奧登堡之反動時代；英國、法國防備甚嚴，尤難進行；巴爾幹及波羅的海沿岸

諸國，雖時有煽動，終爲反對勢力所排擊。布加利亞及愛沙尼亞，則因屢次發生暴動，頗表不滿；今則此類小國，反成列強攻俄之先鋒矣。

東方政策 蘇俄既悟資本主義內部逐漸安定，向歐洲方面之宣傳，已受頓挫；遂將其宣傳工具，轉向亞洲而來。亞洲固久已處於資本主義帝國主義鐵蹄之下者也。大戰後，動以民族思想，各民族皆蠕蠕欲動，以復其自由。蘇俄卽利用此機，牽制歐洲方面之排俄運動，以打破俄羅斯之孤立，而攫住列強之弱點。此眼光遠大之策略也。但行此政策必先獲得亞洲民族之信仰，故蘇俄先爲民族解放之榜樣，宣言與資本主義奮鬥，主張民族自決。凡俄皇時代以侵略方法奪取亞洲各國之領土，悉數歸還。所強迫締結之一切不平等條約，亦均廢棄。對波斯，歸還裏海沿岸之舊波斯領土。對於土耳其，及中國，則廢除一切不平等及祕密條約，并僞稱放棄中國之庚子賠款，以證明蘇俄無帝國主義之野心。披瀝其對弱小民族之誠意，於是專制俄皇之帝國主義，至此告一結束；而所謂蘇俄東方政策之企圖，遂開幕矣。

新新經濟政策 一九二四年以來，政府因國民經濟生活之必要，更擴大新經濟政策

之內容。一九二五年四月，黨幹部即有通過新經濟政策擴充案之舉。內容爲：（一）土地租借之許可；（二）農村中勞力傭工之許可；（三）關於規定穀價之強使執行權，一律取消；（四）稅制之整理；（五）促進農產，提倡商業，以增進農村之生產，圖國家經濟更大之發展。旋經聯盟中央執行委員會批准施行。俄羅斯對於資本之經營，遂爲更進一步之擴張矣。

斯大林 談俄羅斯之革命者，莫不識列寧，齊諾維夫，加美納夫（Kamenev），及托洛斯基四人。蓋列寧乃革命之正宗；齊，加二氏，皆爲列寧之高足；托洛斯基則爲列寧幟下非嫡系之首領也。列寧死後，齊，加二氏，對托洛斯基相互競爭。其次年，托氏退後，一時蘇俄之大權一若歸入齊，加二人之手。實則兩敗俱傷，未幾便轉入向在外國居住之斯大林（Stalin）手中。斯氏握蘇維埃民族政策之機樞，且任東方弱小民族之解放運動。主張勞動者及蘇維埃

成員之給薪，中產農民之優待。爲人酷嗜專政，果斷勇敢；故世人咸呼之爲『列寧第二。』

共產黨之內訌 一九二五年十二月，舉行第十四屆全俄蘇維埃大會。以齊諾維夫及加美納夫二人爲中心，大唱反對中央委員會幹部派（斯大林及布哈林 Bukharin等）

之農民政策，及一般產業政策。於是共產黨內部發生內訌。然因該第十四屆蘇維埃大會，及一九二六年七月之中央執行委員，并中央監察委員會所成立之聯合會，最後以大多數承認幹部派之政策；而對於少數反對派，竟決議應加反對。同時將加美納夫及齊諾維夫等反對派領袖，所任之黨政要職，一律剝奪。內訌始告一段落。

反對派之主張 反對派與幹部派主張之差異，觀一九二六年秋間反對派之重要人物，托洛斯基，齊諾維夫，加美納夫，克魯卜斯加耶（Krupskaya 卽列寧夫人）等人聯名遞交中央委員會之意見書，可知梗概。若輩主張，促進世界革命，蘇俄政府應採取積極政策，吸取外國資本。以無產者——非以農民——為基礎，使蘇俄工業興旺，而成一社會主義之國家。他如第三國際最近之策略，——與國外革命團體之投機分子妥協——反對派亦認為失策。對於黨之內部，反對派則主張民主制；反對斯大林之獨攬黨權。反對派之各支，彼此意見相同之點頗少。但彼等有一具體之相同要求，即取消密探彈劾之制度，而免除一切道德上身體上之恐怖，以冀實現民主主義。幹部派對之，則認為有背無產階級獨裁之原則；故主

張『清黨』以擴清異己之勢力。

反對派勢力之消滅 一九二七年夏季，反對派竟有軍官參加，勢力更大。五月九日蘇維埃大會時，齊諾維夫彈劾中央委員會之瀆職，民氣緊張。類此之事，層出不窮。值此之際，蘇俄正在危急；蓋國際方面，英國對俄絕交，而俄之大使又有在華沙城被殺事件之發生也。旋即有一請願書發表，主張擁護黨之紀律，反對黨內分裂；惟望政府容納民意。嗣後反對派繼續活動，托洛斯基及齊諾維夫二人逐出中央委員會之議，甚囂塵上。此舉不足以寒反對派之膽，且組織較前益固。然會幾何時，第二次大革命之英雄托洛斯基等，卒於一九二八年春季，放逐於西伯利亞及高加索之荒郊矣。最近資本主義之急進，官僚化之鳴張，日騰於報章，蘇俄之前途，究不知稅駕何所而赤色專政之影響，固絕可注意也。

附錄

俄羅斯大事記

吾國與俄羅斯疆境毗連，關係至切。近人更多注意俄國問題，而書坊間對俄國歷史材料之足資參考者，竟付闕如。爲此特於『俄國現代史』編次，將馬季甫與歐海拉二氏所著俄羅斯 (Maikov and O'Hara: Russia) 中之古今大事記遂譯於後。取其精華，刪其繁複，目的在使讀者知十九世紀以前俄羅斯之發達，固非偶然也。

良鑑識

八世紀
九世紀

此時之斯拉夫族人散居於得尼普爾河 (Dnieper) 流域，及倭爾加河 (Volga) 與俄喀河 (Oka) 北岸。貿易中心及城市甚發達。文化三大中心：西北爲諾弗

*

*

*

*

*

*

哥羅 (Novgorod) 西南爲基輔 (Kiev) 東南爲摩達拉干 (Tmutarakan) 歐洲北方人民漸移來。

九八七— 九八九

斯拉夫人率歐洲北方人民攻擊野蠻民族。歐洲北方人因有商業城市之幫助，遂擴張其領土。其中最著者則爲基輔王。斯拉夫人進至黑海及阿剌夫海岸。自諾弗哥羅至基輔間可以河流運輸。斯拉夫人傾向於阿剌伯文化。與拜占庭 (Byzantium) 聯絡甚密。採用基督教及希臘字母。

十一世紀

此時斯拉夫人仍分散於俄喀河與倭爾加河間地方。此區域內有很多都府城市。應時成立。基輔國於本世紀之前半期掃清游牧部落之南部。本世紀之後半期則有其他野蠻部落入寇。

一〇五四

俄羅斯法律第一集 (Russkaya Prava) 出版。巡行武官——即各王公之從者 (Bojars) 居留各處爲地主。

十二世紀

進往東北俄羅斯新建商業中心，曰蘇士達爾 (Suzdal) 與基輔及諾弗哥羅佔

附錄

同等重要地位。世界貿易路線由東歐改爲西歐。基輔漸衰頹。莫斯科漸形重要。俄羅斯諸王爭權。基輔國滅。斯拉夫人東侵。當此之際，家族制度 (Veché) 發達。神話詩及教會文學盛行。莫斯科更興盛。

十三世紀

拜占庭之衰頹影響於諾弗哥羅及基輔間之商業甚巨。近基輔之地域竟變爲荒蕪。自蒙古人來侵之時，成吉思汗於卡爾卡 (Kalka) 一役戰敗俄羅斯後，直至十五世紀，基輔二字於俄史上幾已絕跡。此時俄羅斯東北部之中心如蘇士達爾，的威爾 (Tver) 及莫斯科漸形重要。諾弗哥羅人進行移居。北至白海，東至烏拉嶺。俄羅斯內部劃分爲多數郡國。

一二三七
一四〇

拔都汗 (Batu Khan) 入寇。俄羅斯西南部遭劫掠。東北部屈服韃靼人。諾弗哥羅之家族制度發達。諾弗哥羅乃一家族共和國。有王公爲軍事領袖。俄羅斯東北部諸王得韃靼人之幫助。遂較家族制度下之政府佔優勢。瑞典人於攻克芬蘭後進取諾弗哥羅。德意志人居於波羅的一帶。立陶宛 (Lithuania) 因俄

羅斯南部衰頹遂建設獨立國家。都府同盟 (Hanseatic League) —— 德意志西北各大商埠所組織之聯盟——起始與諾弗哥羅通商。

十四世紀

韃靼人不許斯拉夫人住於俄羅斯之南部及東南部。莫斯科王爲蒙古汗之順臣。因蒙古汗之提攜乃得稱大公爵。 (Grand Duke) 此後俄羅斯漸趨統一。

俄人雖屢欲脫去蒙古人之羈絆，但未成功。最後始由德密崔頓斯闊 (Dmitri

一三八〇

Donkoy) 率諸王戰敗蒙古人於庫立科夫 (Kulikovo)。斯時教堂勢力漸長。

一三八六

波蘭與立陶宛新結聯盟。莫斯科西部因而大驚。諾弗哥羅人越烏拉嶺入西伯利亞以探求毛皮物品。

十五世紀

莫斯科王因蒙古人勢力漸衰獲益良多。旋即北向伸張其領域。莫斯科人在北方效法諾弗哥羅人向東移住。并越烏拉嶺以至西伯利亞。莫斯科王因不能於蒙古人手中獲得完全自由，遂仍持昔日名義上屈服之政策。因之遂能伸張其實力達於鄰邦。伊凡第三爲王。(一四六二年——一五〇五年) 蒙古國權傾

一四五六
一八〇

覆。俄羅斯大帝國因以成立。經濟方面莫斯科較諾弗哥羅優勝多多。各郡之屈服於莫斯科者爲數甚夥。立陶宛國亦漸強盛。未幾莫斯科人卽有進取芬蘭灣之舉。

一四九九

戰勝立陶宛人。

莫斯科由郡改爲國家。拜占庭叛教，不承認教皇主權。此二事造成一種新國家政教理論。教會方面盛稱希臘教中心爲今日之莫斯科——羅馬第三。自伊凡第三與東羅馬皇帝之姪女佐伊葩梨樂格結婚後，莫斯科王更自尊爲皇帝。教會變成若輩之忠臣工具。新興一種軍人地主階級卽將來貴族之起源。俄羅斯西南部被波蘭人征服。

十六世紀

莫斯科國之領域益廣。莫斯科城爲歐洲最大城市之一。「可畏的伊凡」
〔Van the Terrible 一五五三——一五八四〕當朝時乃與英國直接發生關係。莫斯科與歐亞二洲兼行通商。試佔波羅的海而未成功。里窩尼亞〔Livonian〕

一五五二 戰爭。沿倭爾加向東方及東南方，并向斯特波士方面 (Steppe) 擴張。殖民變

一五五六 爲國家之固定政策。佔喀山 (Kazan)。佔阿斯達拉干 (Astrakhan)。因殖

民關係遂建設多數城市及要塞砲台。國家殖民政策多半爲自由哥薩克人，農夫，及富冒險性之商人先行移住。

一五八一 政府用同樣方法向烏拉嶺東面殖民。伊爾馬克 (Irmak) 侵略西伯利亞。國

內農夫之不能謀生者亦往墾殖。但其生活漸須依賴地主。地主則設法使農夫與土地不能分離而受其支配。向南方殖民事業半途受克里米汗 (Crimean Khan) 之挫折。克里米汗攻擊莫斯科國甚力。莫斯科險象環生。然蒙古人未能勝。莫斯科人遂轉而南攻。舊時貴族之勢力日漸衰頹。新興之地主階級及商人遂起而代之。

一五九八 農夫地位因地主之跋扈益見低卑。俄帝波利哥度諾夫 (Boris Godunov) 之

『革新』(1) 俄羅斯東正教之大僧正改爲總主教；(2) 禁止農夫遷移他處

——佃奴。中部貧困異常。奮力墾殖俄羅斯西南部。

十七世紀

本世紀初半期概做內部發展工作。露列克朝 (Rurik Dynasty) 消滅。羣爭帝位。首爲羅曼諾夫朝 (Romanoff) 米開爾 (Michael) 立爲帝。(一六一三——

一六〇二 一六四五) 劇烈旱災。莫斯科政府極端禁止農夫之自由運動。更不許若輩任意遷居南方。

一六〇六 一三

亂世。農民、逃夫、及哥薩克兵之掙扎。富社會上及經濟上之意味。信僞教者及假信教者甚多。波蘭人、瑞典人相繼來侵。民族思想再興。莫斯科驅除波蘭人殆盡。更向東擴張勢力。移民於西伯利亞。哥薩克人佔據堪察加 (Kamchatka)。本世紀後半期內將以前南方喪失之領土逐漸得回。亞列西斯 (Alexis) 朝內烏克蘭 (Ukraine) 脫離波蘭而歸併爲俄羅斯之一部。俄帝統治之下設『祕事部 Department of Secret Matters』——即後日警察密探之張本。政府努力建設陸軍。新貴族漸漸發生。地主採用更嚴之方法。以使農夫與土地不得

稍離完全束縛。制定俄帝『亞列西斯法典』——此乃根據佃奴制度所建之貴族國家的法律也。農夫聽斯坦加拉正 (Stenka Razin) 之指揮，羣起力爭自由。但因組織完備之新陸軍前往鎮壓，未克成功。教會乘亂時雖得回不少勢力，然未幾復屈服於國家之下。教徒分老崇禮派與老信徒二種。此時西歐影響漸及莫斯科。輸入專門的政治的及宗教的思想。

十八世紀

彼得大帝 (一六八九——一七二六) 卽帝位。仿西歐辦法，建設常備陸軍及海軍。向東方及西方移植直達波羅的海。但該處有瑞典人阻擋，勢不得不戰。於那爾瓦 (Narva) 地方，俄羅斯爲瑞典戰敗。此『北部戰爭』之起始也。彼得復增厚兵力，於波爾多瓦 (Poltava) 戰敗瑞典。俄兵乃齊趨瑞典。城市有爲俄兵劫掠者。俄瑞旋訂尼斯塔和約 (Treaty of Nystad)。瑞典割地賠罪。俄羅斯領域爲之一廣。一七一一年彼得遂宣稱爲『所有俄羅斯之君主 Emperor of All Russians』。遠征波斯，侵蝕至裏海。『維新』呼聲日益增高。舊日之議

一七二一

會改爲元老院。其職權頗不清晰；立法，行政，執行，司法，軍事等權兼而有之。此時警察制度漸趨發達。俄羅斯全部劃分爲九行政區。由區長全權治理之。宗教議會由普通總主教教會管理。服從國家指揮。試行直接個人稅則失敗。農夫尤甚。國家鼓勵建設工廠并創辦平民學校。彼得大帝繼承者治理之下，貴族勢力逐漸增大。（喀德鄰第一，一七二五——一七二七；彼得第二，一七二七——一七三〇；安那一七三〇——一七四〇；伊凡第六一七四〇——一七四一；伊利亞伯一七四一——一七六一；彼得第三一七六一——一七六二。）貴族獲得各種特權：教育利益并免盡當兵之義務。國家土地准許貴族使用，因而佃奴制度更行發達。苛稅及各種束縛使農夫之地位日益傾頹。帝國內之地方賦稅設法豁免，以促經濟統一。喀德鄰第二卽位。國家移民向南方及東南方進至阿速夫（Азов）海岸。墾殖新俄羅斯及北高加索。外交侵略政策：第一次土耳其戰爭，結局爲庫巧克（Kuchuk）和約；於是俄羅斯可逕達地中海，俄羅斯之旗幟亦

一七五三

一七六九
一七四

得飄揚於克里米矣。

一七八七 第二次土耳其戰爭因有結賽 (Taty) 和約而終了。

一七七一 瓜分波蘭。俄羅斯得白俄羅斯及服爾欣尼亞 (Volyhnia)、波多里亞 (Podolia)、

一七七二 烏克蘭之大部分。此外更得佔立陶宛及庫爾蘭之大半。瑞典勢力衰頹。普魯士

九五

勢力擴張。佐治亞 (Georgia) 內服俄羅斯帝國。

一七九六 內國政策：貴族勢力增厚。俄帝國之行政區域重新劃分。(行政機關四十；新城

一七八〇

市約計三百。) 政府規定新省區組織。省政府中貴族掌握實權。省政府更掌警

察及司法大權。經濟情形漸恢復。國家不再允許私人享有專利權。豪富貴族創

設工廠甚多。一七九六年約有一百六十一處。中產階級如商人等均自謀利益，

不問閒事。佃奴備受虐待。保羅第一 (Paul I) 時代貴族之權利始加限制。中

央漸行集權。喀德鄰第一時文化復興。備受西歐各國之影響，及法蘭西哲學之

薰陶。俄羅斯語言定為文字之標準。其時貴族亦漸知解放。智識階級乘機興起。

共濟會亦應運而生。宗教方面黨同伐異。智識階級對於佃奴制度及警察制度則極力攻擊。

一七九九 第一次英俄聯盟成立。俄羅斯與他國聯合干涉革命的法蘭西。俄帝銳意擴充其領域。但俄人無移住新地者。

佐治亞與民格里力亞 (Mingrelia) 合作。俄羅斯之外交政策并不以國民之利益爲依歸。完全憑之於專制君主之喜惡。及若輩挽救歐洲險象與保衛舊勢力排斥新勢力等慾望以爲衡。其顧慮最甚者，則預防法國之革命傳播於俄羅斯是也。

一八〇七 英俄聯盟於亞歷山大第一 (一八〇一——一八二五) 時破裂，而定的爾西特 (Tilsit) 條約；此俄羅斯發覺所謂『拿破崙的大陸封鎖』之時也。當此之際，俄羅斯併吞芬蘭，直達多爾尼亞河 (Dornea) 一帶地方。但許其有行政及政治自主權。

一八三二

併吞比薩拉尼亞 (Bessarabia 一八一二) 伊麥里地亞 (Immeritia 一八一

〇) 及後高加索之一部 (一八一三) 未幾與法蘭西戰爭。俄兵至巴黎。旋有維也納會議及神聖同盟之組織。第二次瓜分波蘭。俄帝國遂至全盛時代。尼古拉第一 (一八二五——一八五五) 與土耳其戰爭 (一八二六——一八二八) 并與波斯戰爭。俄均勝。割地謝罪。俄羅斯版圖遂大擴張。竟達多腦河之北岸。黑海之高加索方面岸上。并達後高加索一帶地方。塞爾比亞 (Serbia) 等地許其自主。希臘因得俄法英三國之補助乃成獨立國 (一八三〇) 倫敦條約成立。列強各國保障比利斯之中立。俄羅斯助奧國壓倒其國內之革命運動。克里米戰爭之後。訂巴黎和約。比薩拉比亞之南部歸土耳其。俄羅斯艦隊不得航行於黑海。在波羅的海方面俄羅斯不得於奧蘭島 (Åland Islands) 建設砲台。

一八三九

內政方面俄羅斯倡行實業資本主義。國內更有佃奴。教育。行政諸問題。元老院

組織改變；使成皇帝下之惟一最高機關。

亞歷山大第一廢除准許貴族蓄奴章程。創設新大學四處。專制君主對法國革命主義深爲懼恨。智識界受法國革命思想之影響，組織秘密團體。

一八二五 尼古拉第一即位時發生『十二月之叛』

一八三〇 波蘭叛亂。自此時起尼古拉第一乃採用最高壓之反動政策。但俄羅斯文學及藝術頗有進步。

一八六四 征伐高加索。領域益廣。亞歷山大第二（一八五五——一八八一）於普法戰

一八七一 爭時趁機在黑海伸張勢力。

俄法聯盟破。一八六三年訂俄德同盟，以防奧大利及法蘭西。未幾又有德奧祕密聯盟以制俄。英俄二國在中央亞西亞發生利益衝突。亞歷山大第三（一八一——一八九四）設計使俄羅斯脫離歐洲問題之漩渦而注力於東方。

一八九五 一八九〇年俄法修好。一八九三年遂成軍事協定并成立俄法同盟。

內政方面：克里米戰爭（一八五三——一八五六）證明俄羅斯管理制度及佃奴制度之失敗。其時知識界即做廢除此種制度之工作。觀於大文豪如托爾斯泰等之作品，可以知之。

一八六一

亞歷山大第二宣言反對解放佃奴。貴族反對土地改革事業。農民間怨聲載道。知識階級中之激烈分子遂鼓吹革命。貴族中之愛戴自由者亦主張改革司法及行政制度。提倡地方自治并召集全國代表會議。各大學及中學對政府皆有怨言。虛無主義漸發達。

一八六三

波蘭叛亂，國內多表同情。祕密團體增多，革命呼聲愈高。一八七〇年聖彼得堡地方工人大罷工。

一八七三

一八八一

知識界提倡『到民間去』運動。政府對人民之壓迫變本加厲。國內遂發生恐怖主義。亞歷山大第二被刺。

亞歷山大第三（一八八一——一八九四）仍持壓迫政策。希臘教會之掌教

附錄

一百三十五

——坡埤多諾塞夫——提倡反動思想，影響甚巨。國內常行戒嚴，民生不安。國
民權利剝奪殆盡。

一八九〇

地方自治政府之權利大加限制；政府進而干涉地方自治會議之行動。

地方事業多歸中央政府直接管轄。西伯利亞鐵路起始建築。尼古拉第二（一
八九四——一九一七）旋即位焉。



本書主要參考書

- Bernard Pares: History of Russia
Kornilov: Russian History
Hayes: Political and Social History of Modern Europe
Skrine: The Expansion of Russia
Rose: The Russian Soviet Republic
The Current History
Encyclopaedia Britannica
A. Rambaudi: Histoire de la Russie
Makcev & O'Hara: Russia
D. M. Wallace: Russia

長崎出版館發行

一九四四年

俄國現代史

歐洲近世史

社會主義之思潮及運動

歐美十九世紀外交史

西洋近百年史

勞農俄國研究

勞農俄國之考察

俄國革命史

東方雜誌

勞農露國

一百三十八

何炳松

李季譯

有賀長雄

李泰棻

李達

東方文庫

朱枕薪

商務印書館

川上俊彦

民國二十一年一月二十九日
 敝公司突遭國難總務處印刷
 所編譯所書棧房均被炸燬附
 設之涵芬樓東方圖書館尙公
 小學亦遭焚燬付焚如三十
 五載之經營墮於一旦迭蒙
 各界慰問督望速圖恢復詞意
 懇摯銜感何窮敝館雖處境艱
 困不敢不勉為其難因將需用
 較切各書先行覆印其他各書
 亦將次第出版惟是圖版裝製
 不能盡如原式事勢所限想荷
 鑒原謹布下忱統祈 垂管

上海商務印書館

謹啓

版 權 所 有 翻 印 必 究

中華民國二十年六月初版
 民國廿二年國難後第一版
 五月印行

(五九六)

新時代
 史地叢書
 俄國現代史一冊

每冊定價大洋伍角

外埠酌加運費匯費

撰 述 者	查 良 鑑	校 閱 者	吳 敬 恆	主 編 者	吳 敬 恆 蔡 元 培 王 雲 五	發 行 人	王 雲 五	印 刷 所	上海河南路 商務印書館	發 行 所	上海及各埠 商務印書館
-------------	-------------	-------------	-------------	-------------	---	-------------	-------------	-------------	----------------	-------------	----------------

